


NZAMBI YA NGOLO
ME MONISAMA PWELELE
NA NTWALA YA BETO

 Mu sonikaka mwa Masonuku, yina mu zola sadila samu na kutuba na beno, mpe mu ke na kivuvu ti Nzambi ke sakumuna mwa bangolo ya beto.

² Ntangu yayi, bantu mingi ke kukiyufula ti samu na yinki beto ke bantu ya ngitukulu mpe ya makelele mingi. Beno zaba, yayi ke mutindu ya luswaswanu ya—ya lukutakanu kulutila yina bantu me—me monaka ntete. Mpe, na bantangu nionso, konso manaka ke vwandaka ya kuyidika mbote-mbote na ntwala. Kasi na ntangu beto ke kwisa na balukutakanu ya mutindu yayi, ntangu yayi yina vwandaka ntangu ya munu ya mbote kubanda bamvula mingi na mbatukulu ya yawu, mpe beto ke kwisa kukondwa kuzaba yina beto ke sala. Beto ke kwisa kaka mpe ke kukipesa ya muvimba beto mosi. Yina ke kima mosi kaka beto zaba na kusala. Mpe Nzambi ke sala yina yankaka. Yawu yina ke salaka beto bantu ya ngitukulu.

³ Kilumbu yankaka, muntu mosi tubaka, “Nge zaba, bantu ya nge ke bantu ya ngitukulu.”

Mu tubaka, “Mbote, mu—mu banza ti beto ke mutindu yina.”

⁴ Mpe mu ke bambuka moyo ya mosi ya balukutakanu. Kilumbu mosi Mpangi Troy vwandaka tuba na munu disolo ya mwa Allemand mosi ti yandi bakaka mbotika ya Mpeve-Santu. Mpe kilumbu yankaka, na kati ya magazine mosi sika wapi yandi vwandaka sala, yandi telemisaka maboko ya yandi mpe pesaka lukumu na Mfumu, mpe tubaka bandinga ya malu-malu mpe salaka diambu mosi, ya ngitukulu. Mpe na nsuka, mfumu ya kisalu kwisaka pene-pene ya yandi mpe tubaka, “Heini, yinki ke diambu ya nge?”

⁵ Yandi tubaka, “Oh, mu me vuluka.” Yandi tubaka, “Ntima ya munu me fuluka kaka na kiese.”

⁶ Yandi tubaka, “Mbote, nge fwana kwenda vwanda na nkangu ya bilawu yina kuna.”

⁷ Yandi tubaka, “Yinga. Nkembo na Nzambi!” Yandi tubaka, “Matondo Mfumu samu na bilawu yina.” Yandi tubaka—yandi tubaka, “Baka ditoma mosi, kuna na bala-bala.” Yandi tubaka, “Katula yawu ba ecrou nionso, nge ke vwanda na kima mosi

diaka ve kasi kaka mingi ya ‘bisengo.’” Mpe yina ke kaka. . . Yawu yina kaka, beno zaba.

⁸ Kilumbu mosi, na Californie, mu vwandaka kuna na babalabala ya Los Angeles, mpe mu monaka muntu mosi na kidimbu mosi na ntulu ya yandi, mpe *awa*. Mpe yandi tubaka, “Mu ke kilawu ya Klisto.” Mpe bantu nionso vwandaka ke tala yandi. Mpe mu monaka ti bantu vwandaka baluka samu na kutala, na ntangu yandi vwandaka luta. Mpe mu banzaka ti mu lunga sala mutindu bantu yankaka nionso. Mpe na . . . mukongo ya yandi, yandi tubaka, “Nge ke kilawu ya nani?” Yinga. Mu banza ti beto nionso ke mutindu ya bantu ya ngitukulu, mosi na yankaka, beno zaba.

⁹ Kasi, beno zaba ti, yinza me fikama mingi na nkadulu ya yandi, ti kima mosi ya luswaswanu me kuma ya ngitukulu mingi, ti bantu ke banza ve ti kima mosi ke tambula mbote ve. Mpe ntangu nionso Nzambi ke salaka kima mosi ya luswaswanu, samu na kuvutula diaka bantu na Biblia.

¹⁰ Mu ke banza ti Noé vwandaka mutindu kilawu mosi, samu na nsungi yina ya bantu ya mayele yina yandi vwandaka zinga, samu bawu lendaka ndimisa bantu ti masa ke vwandaka ve na matuti. Kasi Nzambi tubaka ti ke vwanda na masa kuna. Na yawu, Noé, longaka mpe kwikilaka yawu, mpe yandi kumaka kilawu mosi.

¹¹ Mpe mu banza ti na ntangu Moise kwendaka kuna na Egypte, yandi vwandaka kilawu, samu na Pharaon. Kasi beno bambuka ti, Pharaon vwandaka kilawu, samu na yandi, mpe. Na yawu bawu . . . Beto ke bakula yawu.

¹² Yesu mpe monanaka mutindu eretiki mosi. Ya kieleka. Martin Luther vwandaka ecrou, samu na dibuundu ya Catholique. Mpe John Wesley vwandaka kilawu, samu na ba Anglican. Na yawu, beno zaba ti, yayi ke—yayi ke ntangu ya kilawu yankaka. Beno ke banza mutindu yina ve? [Dibuundu me tuba, “Amen.”—Mu.] Kasi, na ntwala ecrou kuvwanda, beno zaba ti, ke vwanda na boulon mosi, ntete, samu na kukanga yawu.

¹³ Na yawu, beno zaba ti, Noé, vwandaka mosi, yandi . . . Beno baka ecrou mosi, yawu ke bendaka boulon, yawu ke vukisa kima mosi, mpe ke simbisa yawu mbote-mbote. Na yawu, Noé vwandaka na kiyeka ya kubenda yina nionso lendaka kwikila, samu na kukota na nzanza, samu na kukeba bawu na lusambusu, samu yandi vwandaka ecrou mosi.

¹⁴ Beto ke mona, ti, Moise basisaka dibuundu na Egypte, samu yandi vwandaka ecrou mosi. Ya kieleka.

¹⁵ Mu banza ti beto ke na nsatu ya ecrou mosi na ntangu yayi, samu na kubasisa Kento ya makwela na nganda ya dibuundu. Beto ke na nsatu ya kima mosi na ntangu yayi, kima yankaka, samu beto ke mutindu ya bantu ya ngitukulu. Mpe mu banzaka

ti, na nkokila yayi, kana Mfumu kuzola, mu ke meka na kutanga mwa Masonuku yina ke fwanana na yayi, mpe beto lenda tuba na beno kaka na mwa ntangu fioti, mpe kumeka kutalisa na beno samu na yinki beto ke mutindu ya bantu ya ngitukulu.

¹⁶ Ntangu yayi beto kota na Masonuku, na kapu 2 ya ba Phillipiens, 1-8, mpe ba Corinthiens ya Zole kapu 3:6. Mpe beto tanga, mutindu beto ke kwikila na Ndinga ya Nzambi.

¹⁷ Mpe na ntangu yayi, na ntwala beto tanga, beto kulumisa bayintu ya beto samu na bisambu.

¹⁸ Tata ya Lemvo ya Mazulu, beto ke bantu me kuzwa ntangu ya mbote, na nkokila yayi, samu na kuzinga na nsungi yayi, mpe kumona bima yayi ke salama, mpe kuzaba ti ntangu me kuma na nsuka, ntangu wapi Yesu ke kwisa samu na Dibuundu ya Yandi. Oh, yina ke sepelisa bantima ya beto, Mfumu! Mpe mutindu beto ke zibula buku, na nkokila yayi, beto ke sambila ti Nge ke pesa beto dilongi ya masonuku yayi. Mpe bika ti Mpeve-Santu kumonisa bima ya mbote na bantima ya beto mpe yina ke sepelisa Nzambi. Samu beto ke lomba yawu na Nkumbu ya Yesu. Amen.

¹⁹ Beno zaba, mu banza ti mu ke lomba na beno na kusala kima mosi. Mu—mu ke lombaka ntangu nionso mwa bima ya ngitukulu, mpe mu banza ti mu ke lomba ve bima mingi ya ngitukulu. Kasi na ntangu beto ke pesa luzitu na drapeau, beto nionso ke telemaka. Mpe—mpe na ntangu drapeau ke luta, beto ke telemaka; yawu yina, beto fwana sala. Beto ke telemaka, samu na kupesa mbote. Beto telega na ntangu beto ke tanga Ndinga, kana beno zola, ba Corinthiens ya Zole kapu 3:6.

Yandi . . . me pesaka beto ngolo ya kuvwanda misadi ya kuzabisa ngwisani ya malu-malu; na misiku ve, kasi ya mpeve: samu misiku ke fwaka bantu, kasi mpeve ke pesaka luzingu.

Kasi kana—kasi kana misiku vwandaka pesa lufwa, yina sonamaka mpe tulamaka na zulu ya matadi, yawu vwandaka na nkembo, na yawu bana ya Israel lendaka tala ve Moise na meso samu na nkembo ya ilungi ya yandi; nkembo yina ya ntangu fioti:

Kana yawu vwandaka mutindu yina wapi mutindu mpeve ke vwanda ve na nkembo ya kulutula mingi diaka?

Ya kieleka kana kisalu yina vwandaka pesa bantu nzengolo ya lufwa vwandaka na nkembo, mutindu ke sala kisalu yina ke sungikaka bantu ke vwanda na nkembo ya kulutula mingi.

Na yawu beto lenda tuba ti nkembo yina monikaka na ntama ke zimbana na ntwala ya nkembo yayi, samu na nkembo yayi ya kulutula nene.

Samu kana bima yina zingaka mwa ntangu fioti vwandaka na nkembo, yinki . . . to yinki mutindu bima yina ke zinga mvu na mvu ke vwanda na nkembo ya kulutila mingi.

Na kuvwandaka na kivuvu yina, beto ke vwanda na kimpwanza ya nene.

Beto ke na kusala ve mutindu Moise, yina vwandaka fika lele na ilungi ya yandi, ti bana ya Israel kutala ve nsuka ya nkembo yina vwandaka na mwa ntangu fioti:

Kasi bawu ke na mayele diaka ve: tii bubu yayi meso ya bawu ke ntete ya kukangama vwale yina na ntangu bawu ke tangaka ngwisani ya ntama; Klisto kaka ke katula vwale.

Kasi tii bubu yayi, na ntangu bawu ke tangaka babuku ya Moise, vwale ke kanga bantima ya bawu.

Kaka kubaluka na Mfumu, ke katula vwale yina. Ve . . .

Kasi Mfumu ke Mpeve yina: mpe sika yina ke Mpeve ya Mfumu, kimpwanza kele kuna.

Kasi beto nionso, yina kele ve na lele na ilungi kele na nkembo ya Mfumu, yina ke soba na kizizi mosi yina nkembo na nkembo mutindu kitala-tala yina ke monisa Mpeve ya Mfumu.

²⁰ Mpe na ba Phillipiens kapu 2, beto ke tanga yayi, kubanda na nzila ya 1, mpe beto tanga tii na nzila ya 8.

Kana—kana beno ke ya kukwikama na Klisto, kana zola ke sadisa beno, . . . beno zaba ti kinkundi ya beno na bampangi ke katuka na Mpeve, kana kele na mwa mawa,

Beno ke fulusa munu na kiese, kana beno wisana, mpe beno ke zola bampangi nionso mutindu mosi, beno vwanda na ntima mosi, mpe mabanza mosi.

Beno talana ve na musoki to na nsatu ya yimbi; kasi na kukikulumusa ya mabanza mpe beno tala bampangi mutindu bantu yina me luta beno.

Beno sosa ve na kusepelisa bansatu ya beno mosi, kasi beno sosa na kusadisa bansatu ya . . . bantu yankaka.

Bika ti beno vwanda na mabanza, yina me fwanana na Klisto Yesu:

Yandi, yina vwandaka na kizizi ya Nzambi, kasi yandi talaka yawu ve mutindu lukumu ya kufwanana na Nzambi:

Kasi yandi talaka yawu mutindu kima ya kunwanina ve, mpe kumaka mutindu musadi, mpe fwananaka na bantu:

Mpe yandi zingaka mutindu muntu, yandi kukikulumusaka yandi mosi, mpe tumamaka tii na lufwa, tii na kundima lufwa ya kulunsi.

21 Beto sambila.

22 Tata ya Mazulu, Ndinga yayi ya nene beto me tanga, na nkokila yayi, na Masonuku ya Nge ya Santu, sala ti Yawu vwanda ya kieleka na bantima ya beto, ti beto ke katuka awa mutindu bayina vwandaka kwenda na Emmaus, mpe tubaka, “Ya kieleka bantima ya beto vwandaka na tiya-tiya ve na kati ya beto na ntangu Yandi vwandaka tuba na beto na nzila?” Samu beto ke lomba yawu na Nkumbu ya Yesu. Amen.

Beno lunga vwanda.

23 Ntangu yayi, yayi ke masonuku mosi ya ngitukulu, kasi mu banza ti yawu ke ya kitoko mingi samu na ntangu ya mutindu yayi. Mu zola tubila dilongi yayi: *Nzambi Ya Ngolo Me Monisama Pwelele Na Ntwala Ya Beto.*

24 Ntangu yayi, kubanda muntu ke zinga, yawu ke na nzala mosi na ntima ya muntu, samu na kuzaba sika yandi me katukaka, mpe yinki ke kikuma ya yandi awa, mpe wapi yandi ke kwenda. Mosi kaka lunga pesa mvutu na yawu, Yandi Yina nataka yandi awa. Mpe ntangu nionso muntu ke zolaka kumona Nzambi.

25 Kuna na Ngwisani ya Ntama, beto ke mona ti Nzambi vwandaka bumbana Yandi mosi na ntwala ya mimpani. Nzambi ke vwandaka na mutindu ya ngitukulu ya kusala na bantu. Yandi ke kukibumba Yandi mosi na ntwala ya mumpani mpe ke kukimonisa pwelele na ntwala ya mukwikidi. Nzambi ke salaka mutindu yina. Nzambi pesaka matondo na Tata, ti, Yandi bumbaka bima yayi na ntwala ya bantu ya ndwenga mpe ya mayele, mpe me monisa Yawu na bana yina zola longuka. Na yawu, beto ke mona ti Nzambi ke sobaka ve, na nkadulu ya Yandi, mpe Yandi ke salaka ntangu nionso kosalu ya Yandi mutindu mosi. Beto me mona ti, na Malachie 3, ti Yandi ke tuba, “Mu ke Nzambi, mpe Mu ke sobaka ve.” Na yawu, Yandi ke salaka kaka mutindu mosi, ntangu nionso.

26 Ntangu yayi beto baka mosi ya mabuku ya nkulu ya Biblia. Na ntangu Job, yina vwandaka muntu ya kieleka mingi na kati ya bantu ya kilumbu ya yandi, muntu mosi ya kulutila mbote na kati ya misiku ya Nzambi, musadi mosi, ya lukumu, musadi ya luzitu, tii kuna Nzambi tubaka, “Kele na mosi ve mutindu yandi, na zulu ya ntoto.” Kasi . . . nsatu ya yandi, na ntangu mosi, vwandaka ya kumona Nzambi. Yandi vwandaka zaba ti kele na Nzambi mosi, mpe yandi vwandaka na nsatu ya kumona Yandi, to, na mutindu yankaka, kukwenda na yinzo ya Yandi mpe kubula na kielo, mpe kutuba, “Mu zola solula na Nge.” Kuvwanda, mpe kusolula na Yandi, mutindu beto ke salaka yawu mosi na yankaka.

²⁷ Beto ke na lubakusu. Kikuma yawu yina beto ke na balukutakanu yayi, sika wapi beto lunga kwisa mpe—mpe kuzonzila mabanza ya beto kintwadi. Mpe—mpe beto ke kuma na lubakusu ya kintwadi, ya kulutila mbote, na ntangu beto ke solula bima ya mutindu na mutindu na kintwadi. Balongi ke salaka mutindu yina. Bantu ya bisika nionso ke salaka mutindu yina, bawu ke solulaka mambu na kintwadi.

²⁸ Mpe, Job, Nzambi vwandaka ya kieleka mingi samu na yandi, yandi zolaka mona kana yandi lendaka kwenda ve, mpe kubula na kielo ya Yandi, mpe—mpe kusolula na Yandi.

²⁹ Kasi beto ke mona ti Nzambi tubaka na yandi, kasi Yandi vwandaka ya kubumbana. Yandi vwandaka ya kubumbana na mutindu ya kitembo mosi. Mpe Yandi tubaka na Job na kukanga mukaba ya yandi; Yandi vwandaka pene-pene na kutuba na yandi, mutindu muntu. Mpe Yandi kulumukaka na mutindu ya kitembo mosi mpe—mpe tubaka na Job. Mpe Yandi monanaka na Job na nzila ya kitembo mosi, kasi yandi monaka Yandi ve. Yandi lungakaka kuwa kaka mupepe ke bula mpe ke baluka pene-pene ya yandi, na kati ya bayinti. Mpe Ndinga basikaka na kitembo, kasi Nzambi vwandaka ya kubumbana na kati ya kitembo.

³⁰ Beto ke mona ti, kuna na Afrique, na Afrique du Sud, bawu ke sadilaka mpova yayi *amoyah*, yina zola tuba, “ngolo yina ke monana ve.”

³¹ Mpe Ngolo yayi ke monanaka ve, na kati ya kitembo, kele na Ndinga mosi ya fioti. Yawu tubaka na Job, mpe yandi me monaka ntete ve mutindu ya Yandi. Kasi Yandi vwandaka ya kubumbana, na yandi, na nzila ya kitembo.

³² Beto ke mona ti mosi ya ba profete ya nene ya Biblia, Moise, ya Ngwisani ya Ntama, mosi yina Nzambi soolaka, yina soolamaka, musadi yina ba zabaka na ntwala, yandi mpe vwandaka na nsatu ya kumona Yandi. Yandi vwandaka pene-pene ya Yandi, mpe yandi monaka bima mingi ya diboko ya Yandi ya nene ya mansweki yina vwandaka kwenda na ntwala ya yandi mpe vwandaka sala bima yina Nzambi kaka lungaka sala. Kilumbu mosi yandi vwandaka na nsatu ya kumona Yandi, mpe Nzambi tubaka na yandi, “Kwenda, telema pene-pene ya ditadi yina.”

³³ Mpe na ntangu yandi vwandaka pene-pene ya ditadi, Moise monaka Yandi ke luta. Yandi monaka mukongo ya Yandi. Mpe yandi tubaka, “Yawu fwananaka na muntu, na mukongo ya muntu.” Mpamba ve, yandi monaka Nzambi ve. Yandi monaka kaka vwale ya Nzambi.

³⁴ Biblia ke tuba ti, “Muntu mosi ve me monaka Nzambi, kasi Mwana mosi kaka ya Tata monisaka Yandi.” Na yawu, Moise monaka Yandi, ya kubambama, mutindu Muntu. Beto ke mona ti Yehowa ya Ngwisani ya Ntama vwandaka Yesu ya Ngwisani ya Malu-malu.

35 Mpe—mpe Docteur Scofield awa, beto ke mona ti, mpova ya yandi, kusoba “mutindu.” Beto ke mona ti mpova yayi *en morphe*, na Grec, yina zola tuba “kima yina ke monanaka ve me monisama.” Kima yina lunga ve. . . Beto zaba ti yawu ke kuna. Ya lunga vwanda. . . lunga monika ve, kasi beto zaba ti ya ke kuna. Mpe na ntangu Yandi sobaka mutindu ya Yandi, ya *en morphe*, yina zola tuba ti Yandi me soba kubanda na mazulu na kimuntu.

36 Mpe Yandi ke sobaka kaka munganzi ya Yandi, na mutindu yankaka, yawu ke mutindu teyatire. Yandi vwandaka sala kisalu mosi. Mpe na Grec, na ntangu bawu ke soba munganzi ya bawu, mbala yankaka muntu mosi ke sala kisa- . . . muntu mosi ke sala bisalu mingi na bisika ya luswaswanu.

37 Mpe mwana ya munu ya kento, yina me vwanda awa, bawu salaka teyatire, na lukolo ya bambuta. Mpe mwana-bakala mosi yina mu zaba, salaka bisalu mbala yiya, kasi yandi lungaka kwenda na manima kuna mpe kusoba munganzi ya yandi—ya yandi, mpe ke vutuka, samu kubaka kisika ya muntu yankaka.

38 Ntangu yayi, kana beto lunga baka ba profesu ya Ngwisani ya Ntama samu na yina Mesiya lendaka vwanda, beno lunga fwanikisa yawu na luzingu ya Yesu, mpe beno ke mona ya kieleka yina Yesu vwandaka. Yandi vwandaka ve mutindu bantu nionso. Yandi vwandaka Nzambi, *en morphe*. Yandi sobaka kubanda na—na mutindu ya mazulu tii na nzutu ya Muntu. Ntete, Yandi vwandaka Nzambi, yina me monisama pwelele na nzutu ya muntu, ya kubumbama na kati ya muntu, vwale ya kimuntu.

Mpe beno tala Ngwisani ya Ntama.

39 Mu—mu—mu zaba ti mu ke tuba na nkangu ya bantu ya luswaswanu, na nkokila yayi, ya bitini ya luswaswanu ya yinza. Mpe beto kele awa samu na kumona yawu. Yinki beto ke—yinki beto ke sala? Nani—nani beto kele? Wapi beto ke kwenda? Yinki ke salama? Yinki nionso yayi zola tuba?

40 Mpe ntangu yayi beto ke mona, awa, ti, kana beno ba Juif ya babakala mpe ya bakento, mpe rabbin na—na—na kati ya tempelo, na bilumbu yina me luta, kana bawu lendaka tala na Biblia, ba profesu, na sika ya binkulu, bawu lungaka zaba yina Yesu vwandaka. Bawu lungaka bokila Yandi ve Béelzéboul. Bawu lungaka koma Yandi na kulunsi ve. Kasi, nionso yina lendaka salama. Kitini yina ya teyatire. Mpe bawu vwandaka meso ya kufwa, na diambu yayi.

41 Yawu ke mutindu mosi na beno babakala, bakento, awa na nkokila yayi, mbala yankaka ya bamvula mosi na munu to mwa mbuta fioti. Beno ke bambuka, awa na Amerique, bamvula mingi me luta, na ntwala. . . Chinois. . . Mpangi ya munu ya bakala, yina me tuba na munu nkumbu ya yandi awa, ti yawu me kwisa na mabanza ya munu na ntangu mu vwandaka tuba na yandi. Bawu vwandaka na kifu ya. . . Bawu lungaka tuba Kingelesi ve, mpe bawu—bawu vwandaka na yinzo ya kusukula bilele. Mpe

beno ke kwendaka na yinzo ya bawu ya kusukula bilele, samu na kusukula bilele ya beno. Chinois yina ke sukulaka bilele lendaka baka kitini ya papié, mpe ke pasula yawu na mutindu mosi. Beno ke baka kitini mosi ya papié; mpe yandi ke baka kitini yina yankaka. Mpe na ntangu beno ke kwisa lomba bima ya beno, bitini yina nionso zole ya papié ke kwelana. Mpe kana yawu kwelana ve mbote-mbote. . . Beno lunga soba yawu ata fioti ve, samu yandi vwandaka na kitini mosi mpe beno vwandaka na kitini yina ya yankaka. Mpe kana ba sobaka yawu. . . Na yawu beno vwandaka na muswa ya kulomba bima ya beno. Mpe beno ke baka bima ya beno, na ntangu beno ke na kitini yina ya yankaka ya ngwisani.

⁴² Yawu ke mutindu mosi, na nkokila yayi, na ntangu beto ke na kitini yankaka ya ngwisani. Na ntangu, Nzambi pasulaka Mwana ya Yandi na bitini zole, na Calvaire, samu na kubaka nzutu ya Munkayulu, mpe kulumusaka Mpeve na zulu ya beto, yina zingaka mbala mosi na kati ya Muntu mosi, Yesu. Nzambi yina mosi kele ya kubumbama na nkokila yayi, na mutindu ya Mpeve-Santu. Bitini yina zole lendaka vukana, na yawu beno ke kuma kitini ya ngwisani. Nzambi salaka yayi, samu na kuzaba mbote muntu, na ntangu Yandi kumaka Yandi mosi Muntu.

⁴³ Mu vwandaka tanga disolo mosi, na mwa bamvula me luta. Mpe na disolo yayi, yawu vwandaka tubila ntinu mosi ya nene, mpe ya lukumu. . . Mu me zimbana nkumbu ya yandi, ntangu yayi. Mu banzaka ve ti mu lendaka tubila disolo yango. Yawu, ke monana ya nsaka, kasi yawu ke twadisa beto na kisika yina ke pesa beto dibanza na yina beto zola tubila. Ntinu yayi, vwandaka ntinu mosi ya lukumu, mpe misadi ya yandi zolaka yandi mingi, tii kuna, kilumbu mosi, na ntwala ya sinzidi ya yandi—ya yandi mpe dibuta ya yandi ya kimfumu, yandi tubaka, “Ya ke mbala ya nsuka bubu yayi, beno ke mona munu diaka ve, samu na bamvula mingi.”

⁴⁴ Mpe sinzidi ya yandi mpe bantu ya yandi tubaka na yandi, “Ntinu ya mbote, samu na yinki nge ke tuba mutindu yina? Nge ke kwenda na yinsi ya nzenza, kisika mosi kuna, samu na kukuma nzenza?”

⁴⁵ Yandi tubaka, “Ve. Mu ke bikala kaka awa. Mbote,” yandi tubaka, “Mu ke kwenda ntama ya bantu ya munu. Mu ke kuma muntu ya bilanga. Mu ke zenga bayinti na muntu yina ke zengaka bayinti. Mu ke—ke bundula ntoto na muntu yina ke salaka bilanga. Mu ke sala vinu na bayina ke salaka vinu. Mu ke vwanda mosi ya bawu, samu na kuzaba mbote-mbote yina bawu ke sala. Mpe mu zola bawu. Mpe mu zola zaba bawu mbote-mbote, munu mosi. Bawu zaba munu ve. Kasi, ntete, mu zola zaba bawu mbote-mbote, mutindu yina.”

⁴⁶ Mpe na suka yina landaka, na ntangu bantu ya yandi monaka yandi, bantu ya yandi nionso, to bayina vwandaka na yinzo ya

kimfumu, yandi katulaka yimpu ya kimfumu mpe kitisaka yawu na zulu ya kiti mosi, kiti ya kimfumu; mpe yandi katulaka robe ya yandi, mpe yandi lwataka bilele ya bantu ya bilanga, samu na kukwenda na kati ya bamputu.

Ntangu yayi, na kati ya mwa disolo yayi, beto ke simba kima mosi samu na Nzambi.

⁴⁷ Bawu tubaka na ntinu, bawu tubaka, “Ntinu, beto ke na mfunu ya nge. Beto zola nge. Beto—beto zola ti nge bikala kaka ntinu.” Kasi yandi ndimaka na kuvwanda mosi ya bawu, samu na kuzaba bawu mbote-mbote, ti bawu lunga zaba yandi mbote-mbote, yina yandi vwandaka ya kieleka. Ya lendaka talisa na bawu ya kieleka yina yandi vwandaka.

⁴⁸ Mpe yawu yina Nzambi salaka. Yandi—Yandi sobaka Yandi mosi, kubanda na Yehowa Nzambi, samu na kukuma mosi ya beto, ti Yandi lenda mona mpasi, Yandi lenda meka lufwa, Yandi lenda zaba yina ntunga ya lufwa vwandaka, mpe kutula ndola ya lufwa na zulu ya Yandi mosi. Yandi kitisaka yimpu ya Yandi—Yandi ya kimfumu mpe robe ya Yandi, mpe kumaka mosi ya beto. Yandi sukulaka makulu ya—ya bantu ya kukikulumusa. Yandi zingaka na kati ya batenta, kintwadi na bamputu. Yandi lalaka na zulu ya mabaya mpe na babala-bala, na bayina vwandaka na mbongo ve. Yandi kumaka mosi ya beto, ti Yandi lenda bakula beto mbote-mbote, mpe beto lenda bakula Yandi mbote-mbote.

⁴⁹ Ntangu yayi, mu banza ti, na yina, beto ke mona, nsobolo, ya Yandi mosi, yina Yandi salaka. Kana beno ke bakula, Yandi kwisaka na nkumbu tatu ya bana ya luswaswanu. Yandi kwisaka na nkumbu ya Mwana ya muntu, mpe ya Mwana ya Nzambi, mpe ya Mwana ya David. Yandi kwisaka mutindu Mwana ya muntu.

⁵⁰ Ntangu yayi, na Ezekiel 2:3, Yehowa, Yandi mosi, bokilaka Ezekiel, profete, “mwana ya muntu.”

⁵¹ *Mwana ya muntu* zola tuba “profete.” Ya lombaka ti Yandi kwisa mutindu yina, samu na kulungisa Deuteronome 18:15, sika Moise tubaka ti, “Mfumu Nzambi ya beno ke basisa na kati ya beno profete mosi mutindu munu.” Yandi kukibokilaka ve Yandi mosi Mwana ya Nzambi. Yandi kukifwanikisaka na Yandi mosi, “Mwana ya muntu,” samu Yandi lendaka kwisa kaka na mutindu ya Masonuku. Beno me mona? Yandi lendaka fwanikisa bitini zole ya papié yina pasukaka, profesu ya Ngwisani ya Ntama mpe nkadulu ya Yandi Mosi, kuvwanda kaka mutindu mosi. Na yawu, Yandi kwisaka, Mwana ya muntu, kwisaka mutindu yina.

⁵² Na yawu beto ke mona ti, na manima ya lufwa ya Yandi, kuzikama, mpe mvumbukulu, Yandi kwisaka na Kilumbu ya Pentecote, mutindu Mwana ya Nzambi; Nzambi, Mpeve, na mutindu, ya Mpeve-Santu. Yinki Yandi salaka? Yandi vwandaka soba Yandi mosi, ke kukizabisa Yandi mosi na bantu ya Yandi na mutindu ya luswaswanu. Mumbandu, Mpeve-Santu, yina

ke Nzambi, Yandi kwisaka sala kosalu na kati ya bansungi ya dibuundu, mutindu Mwana ya Nzambi, Mpeve-Santu.

⁵³ Kasi, na Millénium, Yandi ke kwisa mutindu Mwana ya David, samu na kuvwanda ke na kiti ya kimfumu ya David, Ntinu mosi. Yawu lombaka ti Yandi baka kiti ya kimfumu ya David. Ntangu yayi Yandi ke kiti ya kimfumu ya Tata. Mpe na yawu Yandi tubaka, “Yandi yina ke nunga ke vwanda na Munu na kiti ya Munu ya kimfumu, mutindu Mu nungaka mpe vwandaka na kiti ya kimfumu ya Tata ya Munu.” Na yawu, Yandi, na Millénium, Yandi ke vwanda Mwana ya David. Yinki yawu kele? Nzambi mosi yina, na ntangu nionso, ke soba kaka munganzi ya Yandi—ya Yandi.

Samu na kento ya munu, mu ke, bakala ya yandi.

⁵⁴ Beno me bakula? Kento yina ya Syrophenicie tubaka, “Nge Mwana ya David, wa munu mawa.” Yandi, yawu salaka kima mosi ve na Yandi, na mutindu nionso. Yandi vwandaka na muswa ve ya kubokila Yandi mutindu yina. Yandi vwandaka na kima ya kulomba na Yandi ve mutindu Mwana ya David. Yandi vwandaka . . . Yandi ke Mwana ya David, samu na ba Juif. Mpe ntangu yayi Yandi me kwisa . . . Kasi na ntangu yandi bokilaka Yandi, “Mfumu,” Yandi vwandaka Mfumu ya yandi, na yawu yandi bakaka yina yandi lombaka.

Ntangu yayi, kaka, Yandi ke kukisoba Yandi mosi.

⁵⁵ Ntangu yayi, na yinzo ya munu, mu ke na mutindu tatu ya bantu ya luswaswanu. Na yinzo ya munu, kento ya munu ke kwisa na munu mutindu bakala ya yandi. Mwana ya munu ya kento kuna, yandi ke kwisa na munu ve mutindu bakala ya yandi; mu ke tata ya yandi. Mpe mutekolo ya munu kuna, mu ke nkooko ya yandi, na yawu yandi ke na muswa ve ya kubokila munu tata ya yandi. Mu ke tata ya yandi ve. Mwana ya munu ke tata ya yandi. Mu ke nkooko ya yandi. Kasi mu ke kaka muntu mosi.

⁵⁶ Mpe Nzambi, yinki Yandi ke sala, Yandi ke soba kaka Yandi mosi, samu na kuvwanda na nsungi yina, samu na kukimonisa Yandi mosi na bantu yina. Mpe kikuma yawu yina beto kele awa samu na kumona yawu, na nkokila yayi. Yinki mutindu Nzambi ke kukimonisa Yandi mosi na bantu yayi mpe na ntangu yayi? Yandi ke sobaka munganzi ya Yandi, Yandi ke sobaka kosalu ya Yandi, kasi Yandi ke sobaka ve kikalulu ya Yandi. Yandi ke sobaka ve nkadulu ya Yandi—ya Yandi. Yandi ke sobaka kaka munganzi ya Yandi, na muntu mosi na yankaka. Yandi ke salaka yawu, samu na kukimonisa Yandi mosi pwelele na bantu, ti bawu lenda zaba nani Yandi kele, mpe yina Yandi kele.

⁵⁷ Na ba Hebreux kapu 1, beto ke tanga ti, “Nzambi, na bambala mingi mpe na mutindu mingi tubaka na batata ya beto, na nzila ya ba profete, kasi na bilumbu yayi ya nsuka na nzila ya Mwana ya Yandi, Yesu.”

58 Ntangu yayi, “Ba profete,” Yesu tubaka, na ntangu Yandi vwandaka awa na zulu ya ntoto ti, “bawu vwandaka banzambi. Beno ke bokilaka bawu ‘banzambi,’ bantu yina Ndinga ya Nzambi kwisaka na nzila ya bawu. Mpe beno lunga buka Masonuku ve,” Yandi tubaka. Yandi tubaka, “Samu na yinki beno ke bedisa Yandi, na ntangu Yandi ke Mwana ya Nzambi?” Beno me mona?

59 Ndinga ya Nzambi kele ya kukabisa na konso nsungi, yina Yawu ke vwanda. Mpe Yesu vwandaka muvimba ya ba profesi nionso. “Na nzutu ya Yandi vwandaka muvimba ya Kinzambi.” Yawu vwandaka na Yandi. Yandi Yina vwandaka na Joseph. Yandi ke Mosi Yina vwandaka na Elie. Yandi ke Mosi Yina vwandaka na Moise. Yandi ke Mosi Yina vwandaka na David, mutindu ntinu yina me losama.

60 Bantu ya yandi mosi losaka yandi, mutindu ntinu. Mpe na ntangu yandi vwandaka basika na nganda ya—ya lupangu ya kimfumu, mwa, kikata mosi yina vwandaka tambula na mpasi, mpe yina vwandaka sepela ve na luyalu ya yandi—yandi, systeme ya yandi, losilaka yandi mate. Mpe sinzidi ya yandi basisaka mbele ya yandi, mpe tubaka, “Mu lunga zenga ve yintu ya yimbwa yayi, me losila ntinu ya munu mate?”

61 Mpe David, mbala yankaka yandi vwandaka bakula ve yina yandi vwandaka sala na ntangu yina, kasi yandi pakulamaka. Mpe yandi tubaka, “Beni bika yandi. Nzambi me tuba na yandi na kusala mutindu yayi.” Mpe yandi mataka na zulu ya mongo mpe dilaka samu na Jerusalem, ntinu yina me losama.

62 Beno me bakula yawu? Mwa bankama ya bamvula na ntwala, Mwana ya David bawu losilaka yandi mate, na babala-bala, mpe vwandaka na zulu ya mongo, mongo yina kaka, ke tala Jerusalem, Ntinu yina me losama. Mpe bokaka, “Jerusalem, mbala yikwa mu zolaka vukisa beno mutindu mama ya nsusu ke sala samu na bana ya yandi, kasi beno zolaka ve!”

63 Yandi me sobaka ntete ve nkadulu ya Yandi, samu Hebreux 13:8 ke tuba, “Yandi ke mutindu mosi mazono, bubu yayi, mpe kukonda nsuka.” Nzambi mukama muntu, samu na kufwa, samu na kuvulusa beto na masumu. Kikuma yawu yina Yandi sobaka Yandi mosi, samu na kuvwanda Muntu.

64 Beto ke mona, na Santu Jean 12:20, ba Grec waka nsangu ya Yandi. Ntangu yayi, muntu mosi ve lungaka kuwa Yandi kukondwa bantima ya bawu kupela samu na Yandi. Mutindu Job mpe ba profete ya nkulu, bawu zolaka mona Yandi. Na yawu, ba Grec yayi kwisaka samu na kumona Yandi. Bawu kwisaka na Philippe, yina vwandaka muntu ya Bethsaida, mpe tubaka, “Tata, beto zola mona Yesu.”

65 Ba Grec zolaka mona Yandi, kasi bawu lendaka mona Yandi ve samu Yandi vwandaka na tempelo ya bantu ya Yandi. “Nzambi vwandaka na kati ya Klisto, mpe salaka ti ngwisani

kuvutuka kati-kati ya yinza na Yandi mosi.” Ntangu yayi beto ke mona ti, na yawu, ba Grec yayi lendaka mona Yandi ve.

⁶⁶ Mpe beno tala bandinga yina Yesu tubaka na bawu, na ntuala. Yandi tubaka, “Kana mbuma ya disangu kubwa na ntoto ve, mpe kufwa, yandi bikala yandi mosi.” Na mutindu yankaka, bawu lungaka mona Yandi ata fioti ve na mutindu yina ya nsobolo, na munganzi yina Yandi vwandaka kuna, samu Yandi vwandaka ya kubumbana na nzutu ya muntu. Kasi na ntangu mbuma yina ya Disangu ke bwa na ntoto, Yawu ke nata bantu nionso. Yandi kwendaka samu na ba Juif, ya kieleka, na ntangu yina. Kasi mbuma yayi ya Disangu lendaka kubwa; yawu bumbaka Nzambi, na nzutu ya muntu, bumbanaka na ntuala ya mimpani, kasi monisamaka pwelele na ntuala ya bakwikidi.

⁶⁷ Na Jean 1, “Na mbatukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka muntu, mpe zingaka na kati ya beto, mpe beto monaka Yandi, Mwana mosi kaka ya Tata, yina me fuluka na lemvo.” Ntangu yayi, na mbatukulu vwandaka Ndinga. Ndinga ke dibanza yina me tubama.

⁶⁸ Na mbatukulu, Yandi vwandaka Nzambi ve. Ntangu yayi, mpova ya beto ya Kingelesi bubu yayi, *Nzambi*, zola tuba “kima ya kusambila.” Mbala yikwa yawu ke mubulu na mabanza. Beno lunga sala muntu mosi nzambi. Beno lunga sala konso kima yina nzambi.

⁶⁹ Kasi na Ngwisani ya Ntama, na Genese 1, “Na mbatukulu *Nzambi*,” mpova ba ke sadilaka keke, Elohim. *Elohim* zola tuba “yina ke zinga na Yandi mosi.” Yinki luswaswanu keke kati-kati ya mpova yayi Elohim, na mpova ya beto Nzambi. *Elohim* zola tuba “yina ke zinga na Yandi mosi.”

⁷⁰ Beto lunga zinga na beto mosi ve. Beto lunga vwanda na ngolo nionso ve, ya ngolo nionso, yina ke bisika nionso, yina ke monaka nionso. Nionso yayi zola tendula yina keke Elohim. Beto lunga vwanda mutindu yina ve. Yinti yina beno ke sala nzambi, to—to yinzo mosi, ke zingaka na yawu mosi ve.

⁷¹ Na yawu, Nzambi, na mbatukulu, vwandaka Luzingu, Yina ke ya Kukonda nsuka. Na kati ya Yandi vwandaka bisalu, mpe bisalu yina kumaka Bandinga, mpe Ndinga kumaka muntu. Yesu vwandaka Tata musumbi. Mpe *kusumba*, zola tuba, “kuvutula na kisika na yawu.” Kana Yandi ke vutula yawu na kisika na yawu, yawu lendaka vwanda kaka kisika mosi samu na kuvutula yawu. Na yawu, beno me mona, bantu nionso ke mona yawu ve, samu na mbatukulu bantu nionso vwandaka ve na mabanza ya Nzambi. Beno me mona?

⁷² Beno tala banganga-Nzambi. Na ntangu bawu monaka Yandi ke kukifwanikisa Yandi mosi na Ndinga, yina Yandi vwandaka, bawu tubaka ti, “Yawu ke Béélzébul.” Yina ke talisa

kisika nkadulu ya bawu vwandaka. Yawu vwandaka na dibanza ya bilumbu yayi na kilumbu yina.

⁷³ Kasi na ntangu kento yina ya pité, yina Yandi kutanaka na yandi na mwelo, mpe tubaka na yandi, mpe talisaka kidimbu ya Yandi ya mesiya, na kutubaka na yandi yina yandi salaka. “Samu na yinki,” yandi tubaka, “Tata, mu ke mona ti Nge ke Profete. Beto zaba ti, Mesiya, na ntangu Yandi ke kwisa, Yandi ke tuba na beto bima yayi nionso.” Yandi zabaka Yandi mutindu Mesiya, Yina ba pakulamaka, samu Yandi lungisaka Masonuku. Beno ke mona yawu ve? [Dibuundu me tuba, “Amen.”—Mu.] Bitini zole yina ya papié ke vukana kisika mosi. Yandi, “Beto zaba ti, na ntangu Mesiya ke kwisa.”

⁷⁴ Ntangu yayi, mbala yankaka Nzambi vukisaka *yayi* na *yina*, samu na kuzwa tembele ya ngunga yayi, mutindu musadi ya bisengo. Kasi na ntangu Yesu balukaka, mpe tubaka, “Mu ke Yandi yina ke tuba na nge,” kuvwandaka diaka ve na bandinga mutindu “Béelzébul.” Yandi yambilaka dibungu ya yandi ya masa, kwendaka ntinu na kati ya mbanza, mpe tubaka, “Beno kwisa, tala Muntu Yina me tuba na munu bima yina mu salaka. Yayi ke Mesiya ve?” Beno me mona?

⁷⁵ Ntangu yayi, yinki salaka yayi? Ngwisani yayi ya Masonuku ya ntama na nzingilu yina—yina Yesu vwandaka pesa yandi, yinki yawu salaka? Yawu salaka Mesiya. Mpe beno me bakula yawu? Na nswalu nionso, yandi bakaka lemvo ya masumu ya yandi, samu, na mbatukulu, yandi vwandaka yina lendaka vuluka, samu yandi vwandaka na dibanza ya Nzambi ya mbatukulu. Na yina, yawu vulusaka yandi, to vutulaka yandi na manima, na ntangu yandi monaka kumonisama pwelele ya Masonuku yina zabisamaka na ntwala, ya Yehowa, yina Yandi vwandaka, yina Yandi kele.

⁷⁶ Ntangu yayi, na ntangu Yesu kwisaka, kana Yandi kwisaka na nsangu ya Noé, yawu lendaka sala ve. Kutunga nzanza, mpe yawu tambula na zulu ya masa, yawu lungaka sala ve. Kasi Noé vwandaka kitini ya Nzambi. Yandi vwandaka zinga na mutindu ya ngitukulu samu yandi vwandaka ya ngitukulu, mpe nsangu ya yandi vwandaka ya ngitukulu samu yawu vwandaka kumonisama pwelele ya Ndinga.

⁷⁷ Yandi lungaka kwisa ve na nsangu ya Moise, samu yawu lungaka sala ve. Moise vwandaka Nzambi, na kitini, yina monisamaka pwelele. Yandi vwandaka ndinga yina me tubama samu na ngunga ya yandi, kasi Yesu lendaka kwisa mutindu yina ve. Biblia tubaka ata fioti ve ti Yandi lungaka kwisa mutindu yina.

⁷⁸ Kasi na ntangu Yandi kwisaka, kaka mutindu Ngwisani tubaka ti Yandi lendaka talisama, na yawu bayina nionso lendaka vuluka kwikilaka Yandi, samu bawu vwandaka mabanza ya Nzambi. Bisalu ya Yandi na mbatukulu, kumaka

muntu, mpe bantu yina lendaka vuluka, mpe bawu vutukaka na Nzambi. “Na bayina nionso ndimaka Yandi, Yandi pesaka bawu ngolo ya kukuma bana ya Nzambi,” samu bawu vwandaka bantu yina lendaka vuluka. Kubanda na mbatukulu, bawu vwandaka na kati ya kutalisama.

⁷⁹ Kana beto lungaka telema fioti awa, kana yawu lenda salama, mpe kubanza yawu, na nkokila yayi, samu na Nsangu ya ntangu, mabanza ya Yehowa yina me monisama pwelele. “Na ntwala ya kusalama ya yinza,” ya me tubama na beto ti, “bankumbu ya beto vwandaka na Buku ya Luzingu ya Mwana-dimeme.” Na yina beto lunga mona na balweka zole, mutindu mu tubaka yawu, samu na yinki lweka mosi ke ya ngitukulu na yankaka. Yawu fwana vwanda kaka mutindu yina. Ya ke vwandaka kaka mutindu yina. Ntangu nionso yawu ke vwandaka mutindu yina, mpe yawu ke vwanda kaka mutindu yina. “Yandi vwandaka Ndinga. Mpe Ndinga kumaka muntu mpe zingaka na kati ya beto.”

⁸⁰ Ntangu yayi, Nzambi, na . . .kuna na bilumbu ya Ngwisani ya Ntama, beto ke mona ti na manima Yandi monanaka na bantu ya Yandi, na mutindu ya luswaswanu, Yandi kukibumbaka Yandi mosi na manima ya bampusu ya nkulu ya baniama. Nzambi bumbanaka na manima ya bampusu ya baniama, kiti ya Yandi ya mawa. Beto ke mona ti, Salomon, na ntangu yandi tambikaka tempelo ya Mfumu, mpe bampusu yayi ya baniama vwandaka diembela kuna, vwale, mutindu Yandi kotaka mutindu Dikunzi ya Tiya mpe ya Dituti, mpe kwendaka kuna na manima, mpe Yandi bumbanaka, na yinza. Kasi, na lukwikilu, Israel zabaka ti Yandi vwandaka kuna na manima. Bawu zabaka ti Yandi vwandaka kuna, bawu waka ve yina mimpani ya yinza lendaka tuba. Yandi bumbanaka na mumpani. Kasi mukwikidi, na lukwikilu, zabaka ti Yandi vwandaka kuna na manima. Bawu zwaka mawa. Mpe Yandi vwandaka na kiti ya Yandi ya mawa, yina vwandaka kinsweki mosi ya nene.

⁸¹ Beno zaba ti, na Ngwisani ya Ntama, kukota na manima ya bampusu yina vwandaka lufwa. Ntangu yayi kuvwanda na nganda na yawu kele lufwa. Na ntangu yina kukota na Nkembo ya Yandi vwandaka lufwa. Ntangu yayi kuvwanda na nganda ya Nkembo ya Yandi kele lufwa. Yina salamaka, ya kieleka, na kupasuka ya vwale yina na Calvaire, na ntangu vwale pasukaka, vwale ya nkulu. Ntangu yayi kumanga kuvwanda na Ntwala ya Yandi kele lufwa. Na ntangu yina kuvwanda na Ntwala ya Yandi vwandaka lufwa. Beno me mona? Yawu ke soba na yayi mpe na yina, mpe beno tala na Masonuku samu na kumona yinki kilumbu beto ke zinga.

⁸² Ntangu yayi, na ntangu vwale pasukaka na Calvaire, kiti ya mawa monanaka na ntwala ya bantu nionso. (Kasi yinki salamaka? Yandi tulamaka kuna na Calvaire, ke nokisa Menga.) Mpamba ve bawu bakaka menga, bamvula na manima ya

bamvula, na busantu ya tempelo mpe na sika ya kumwangisa mawa, kuna, Nzambi, na ngolo ya Yandi ya nene ya nzasi, pasulaka vwale yina ya nkulu ya baniama kubanda na zulu tii na nsi, mpe kiti ya mawa monanaka na ntwala ya bantu nionso.

⁸³ Mwana-dimeme ya kieleka ya Nzambi, mpe ya kisina tulamaka na Calvaire na ntwala ya bantu nionso, kiti ya kieleka ya Mawa, na ntangu Nzambi futaka ntalu, Yandi mosi; mpe kumaka mosi ya beto, mpe kukitalisaka Yandi mosi mutindu Muntu, samu na kuzaba beto, mpe beto zaba Yandi. Kiti ya Mawa vwandaka na ntwala ya Israel nionso na kilumbu yina ya Lemvo ya masumu.

⁸⁴ Kasi, helas, binkulu yina dibuundu ya batata ya kilumbu yina vwandaka na yawu, na nzila ya binkulu ya bawu, vwandaka bumba Kiti ya kieleka ya Mawa na ntwala ya bantu. Kana bawu zabaka Masonuku, konso kitini lendaka kwisa mutindu mwa papié ya ba Chinois. Profesi ya Ngwisani ya Ntama lendaka monisama pwelele, mpe yawu monisamaka pwelele. Mpe kana bawu longukaka Masonuku, bawu lendaka mona Kiti ya Mawa. “Mutindu Moise,” tubaka awa, ti, “tii bubu yayi vwale ke na zulu ya bawu. Yawu ke kaka na zulu ya bantima ya bawu.” Bawu ke mona Yawu ve.

⁸⁵ Kasi, Yandi vwandaka Nzambi, mpasi na Lemvo ya masumu. Yandi vwandaka Kiti ya Mawa ya kisina yina vwandaka na ntwala ya bantu. Mutindu mukunga yina beto ke yimbilaka:

Beno tala, Yandi yina na ntwala ya bantu nionso.

Yandi yina, Munungi-mvita ya ngolo,

Kubanda na ntangu Yandi pasulaka vwale na bitini zole.

⁸⁶ Beno me mona, Yandi kwisaka, mutindu Kiti ya Mawa, na ntwala ya dibuundu. Kasi bawu, vwandaka ya kubendumuka na dibanza ya bantu nionso . . .

⁸⁷ Ntangu yayi, babakala na bakento, mpe banzenza na lukutakanu yayi, mu zola tuba yayi kukondwa kukatula muntu mosi. Kasi, na kutala mbote kilumbu yayi, na kutala mbote kikuma beto me kwisila awa bubu yayi, mu ke na boma ti binkulu ya batata, batata ya dibuundu, kubumba Yayi na ntwala ya bantu mingi. Kubanda Mpeve-Santu kwisaka na bilumbu yayi ya nsuka, mutindu yawu tubamaka na profesi, mpe vwale pasukaka, kasi bantu mingi ke meka na kukangama na binkulu ya batata ya bawu. Mpe kikuma yawu yina bawu ke mona ve kiese yayi, mpe ngemba ya kulutila nene, mpe bima yina Dibundu kele na yawu bubu yayi. Mpamba ve, Yawu ke na ntwala ya bantu yina ke kwikilaka.

Yandi bumbaka Ndinga, Ndinga ya nsilulu ya bubu yayi.

⁸⁸ Ntangu yayi, binkulu salaka vwale mosi. Bawu ke tuba ti bilumbu ya bimangu me luta. Muntu mosi tubaka na munu,

tata mosi ya mbote, ya bumuntu ya mbote kuna na Tucson, na Arizona, sika wapi mu ke zingaka. Mu vwandaka na lukutakanu na Ramada. Mpe beto tubaka na Lukutakanu ya Bantu ya Mumbongo sika wapi Mfumu Yesu vwandaka mpe salaka bima ya nene. Mpe tata ya Muklisto yayi kwisaka na munu, mpe yandi tubaka. . . Longi ya dibuundu mosi, muntu mosi ya mbote, mpe yandi tubaka, “Mpangi Branham, nge ke meka na kutalisa na bantu nsungi mosi ya bantumwa,” yandi tubaka, “mpamba ve ti nsungi ya bantumwa me lutaka.”

⁸⁹ Mpe mu tubaka, “Na lemvo ya nge, mpangi ya munu, songa munu na Masonuku, yinki ntangu nsungi ya buntumwa me lutaka.” Mu tubaka, “Nsungi ya bantumwa bandaka na Kilumbu ya Pentecote, mpe yawu me. . . Pierre tubaka, na Kilumbu ya Pentecote ti, ‘Nsilulu kele samu na beno, mpe samu na bana ya beno, mpe samu na bayina nionso kele ntama, ya mingi Mfumu Nzambi ya beto ke bokila.’ Yinki ntangu yawu me lutaka? Kana Nzambi kele na kubokila, na yawu nsungi ya bantumwa kele kaka.”

⁹⁰ Mpe mutindu yina bantu mingi ke meka na kukanga meso ya bantu mingi, na binkulu ya bambuta, mutindu yawu vwandaka na ntangu ya ntama. Mpe beno ke mona ve samu na yinki bantu ke ya kufuluka na kiese mpe ke yangalala. Mpe—mpe balukutakanu yayi kele ya mutindu ya ngitukulu, mutindu kima mosi ya ngitukulu, samu na bantu yankaka, samu ti bawu me luta bikaku yina. Bawu me luta ba vwale yina, samu na kuvwanda na Ntwala ya Nzambi, sika wapi bawu ke mona nsilulu ya ntangu yayi yina me monisama pwelele na ntwala ya bantu. Bawu ke mona yina Nzambi silaka.

⁹¹ Na Joel 2:28, Yandi silaka, ti, “Na bilumbu yayi ya nsuka ke vwanda na mvula ya ntete yina ke *mwangana* na zulu ya bantu, na bilumbu ya nsuka.” Mu banza ti mpova ya Grec kele *kenos*, yina zola tuba ti Yandi “me kukimwangisa” Yandi mosi. Ya ke mutindu beto ke tubaka yawu ve, mutindu kima mosi vwandaka na kati ya muntu mosi, yina Yandi me mwangisa. Kasi, Yandi me kukimwangisa Yandi mosi.

⁹² Yandi sobaka; *en morphe* ya Yandi. Yandi—Yandi sobaka, kubanda na yina Yandi vwandaka, tii na yina Yandi kele. Yandi ke sobaka ata fioti ve nkadulu ya Yandi. Kasi na Kilumbu ya Pentecote, Yandi sobaka Yandi mosi kubanda na Mwana ya muntu, tii na Mwana ya Nzambi. Yandi kwisaka, *na* bantu ve. Yandi kwisaka *na kati* ya bantu, beno me mona, Nzambi mosi yina, ke fula ministere ya Yandi, na nsungi yayi ya nene.

⁹³ Yandi pesaka profesi na kati ya Biblia, ti, “Ke vwanda na kilumbu mosi yina ba ke bokila ve kilumbu to mpimpa, kasi Nsemo ke vwanda na ntangu ya nkokila.” Ntangu yayi, mwini, na kulanda geographie, yawu ke basikaka este mpe ke lalaka na weste. Yawu ke mwini mosi kaka, na bantangu nionso. Ntangu

yayi, na ntangu, Mwana, M-w-a-n-a, kukitalisaka Yandi mosi na kumonisama pwelele ya Ndinga ya nsilulu, na Israel, kuna na bantu ya Este.

⁹⁴ Beto ke na kilumbu mosi ya mudidi. Beto vwandaka na nsemo na ntangu ya ba refomatere, mpe nionso yina, samu na kusala bayinzo-Nzambi mpe ba denomination, mpe samu na kukota kuna mpe kukuma mosi ya bawu; mpe kuyamba ba bébé, mpe kukwela bambuta, mpe kuzika bamvumbi, mpe nionso yina; mpe kuzinga na yinzo-Nzambi.

⁹⁵ Kasi, na ntangu ya nkokila, “Yawu ke vwanda na Nsemo,” Yandi tubaka ti, “na ntangu ya nkokila.” Mpe Disonuku mosi ve lenda bukana. Mpe M-w-a-n-a mosi yina kukimwangisaka Yandi mosi, *kenos*, na Kilumbu ya Pentecote, pesaka nsilulu ya kusala kima ya mutindu mosi na ntangu ya nkokila. Beno me mona? Yawu ke landa nsilulu.

⁹⁶ Beno vukisa bitini nionso zole ya papié. Beno tala yina ke salama, mpe beno tala yina Yandi silaka, na yina beno ke mona sika wapi beto kele. Beno vukisa yawu kisika mosi. Beno lunga mona kumosisama ya Muntu yina ya nene mpe ya ngolo. Binkulu me fwa meso ya bantu, diaka, na bima yayi ya nene yina tubamaka na profesii.

⁹⁷ Moise, na ntangu yandi kulumukaka na mongo, yina vwandaka na Tiya, yinki kifwanisu yayi!

⁹⁸ Moise kwendaka kuna na Egypte mpe tubaka na dibuundu ya batata ti Mfumu Nzambi monanaka na yandi na Nkumbu ya “MUNU KELE.” Nkumbu yina kele na ntangu yayi; kele ve ti “Mu vwandaka; Mu ke vwanda.” Kasi, “MUNU KELE,” mutindu mosi kaka, mutindu mosi mazono, bubu yayi, mpe kukonda nsuka. Yandi kele na ntangu yayi. Yandi. . . Yina me fwanana na Hebreux 13:8, “Yesu Klisto ke mutindu mosi mazono, bubu yayi, mpe kukonda nsuka.”

⁹⁹ Yawu ke kaka Ndinga yina pesamaka na profesii. Mpe, dibuundu, lendaka vukana na Ndinga, nzingilu ya bubu yayi. Ba reformatere vwandaka na yawu, oh, kasi yayi ke kilumbu yankaka. Beno tala kilumbu yina beto ke zinga. Kaka mutindu Yandi lendaka kwisa ve, na bilumbu yina Yandi kwisaka na zulu ya ntoto, na—na mutindu Moise kwisaka, to konso profete yina kwisaka; yawu tubamaka na profesii ve. Mpe na bilumbu yayi ya nsuka, yawu me tubama na profesii na kukwisa mutindu yayi. Yawu lunga kwisa ve na mutindu ya reveil ya Luther. Yawu lunga kwisa ve na mutindu ya reveil ya Wesley. Yawu ke ngunga ya kusungika. Ya ke ntangu yina yawu lendaka vutukisa na Nsemo ya kisina ya Mwana, ya kisina.

¹⁰⁰ Oh, yinki mutindu beto lenda simbisa Masonuku, na yina! Mpe beno ba théologien, yawu vwanda konso kizunga yina beno me katuka, beno zaba ti Yina ke kieleka. Yawu ke nsilulu. Yawu yina ke sala ti bantu kuvwanda ya ngitukulu. Yawu yina ke sala

ti bantu kuvwanda ya ngitukulu, mutindu beno ke bokila bawu. Ya ke samu ti bawu. . . ya ke. . . Vwale ya binkulu, me zibuka, mpe bawu ke mona Yawu. Yandi ke mutindu mosi mazono, bubu yayi, mpe kukonda nsuka. Beno me mona? Ya ke—ya ke nsilulu ya Nzambi, mpe beto lenda telemina yina ve, samu beto lunga buka Masonuku ve. Yinga. Beto ke mona ti Yandi silaka yawu. Yandi kukikotisaka Yandi mosi na bantu ya Yandi. Mpe Yandi ke mutindu mosi mazono, bubu yayi, mpe kukonda nsuka.

¹⁰¹ Moise, na manima kukwenda kuna na Egypte mpe zabisaka yayi, na yawu Tata ndimisaka nsangu ya yandi, mpe kwisaka na Mongo ya Sinaï, na Dikunzi ya Tiya mosi yina, mpe fulusaka mongo na Tiya. Beto me bakula yawu? Yandi yina pesaka nsilulu, Yandi nataka yandi na ntuala na Ndinga. Yandi vwandaka na misiku. Mpe samu na kuvwanda na misiku, yandi lendaka. . . Misiku vwandaka Ndinga. Ndinga ntete-ntete lendaka kwisa ata fioti ve na bantu. Mpamba ve, Ndinga ke kwisaka ntangu nionso na profete, mpe yandi vwandaka profete ya ntangu yina.

¹⁰² Mutindu mosi, Yesu vwandaka Ndinga. Jean vwandaka profete. Mpe Yesu kwisaka na yandi, kuna na masa, samu Ndinga ke kwisaka ntangu nionso na profete, kukondwa kubwa. Beno me mona? Ndinga ke kwisaka na yawu.

¹⁰³ Na yawu, Moise, Ndinga kwisaka na yandi, misiku. Mpe yandi vwandaka na yawu. Samu na yinki, ntangu yayi? Na ntuala Ndinga kubasika mpe kumonisama pwelele, Moise lendaka bumba ilungi ya yandi, samu Ndinga monisamaka pwelele na muvimba na yawu ve. Bawu zabaka ti kima mosi me salama, kasi bawu zabaka ve yinki yawu vwandaka, makelele mpe banzasi. Tii kuna, bawu tubaka, “Bika ti Moise kutuba, kasi Nzambi ve.”

¹⁰⁴ Mpe Nzambi tubaka, “Mbote, Mu ke sala mutindu yina. Kubanda ntangu yayi, Mu ke monika diaka ve mutindu yayi. Mu ke tinda bawu profete mosi. Na yawu yandi ke. . . Mu ke tuba na nzila ya profete ya Munu.”

¹⁰⁵ Ntangu yayi, kana Moise, na misiku ya kimuntu, (mutindu Paul, na ba Corinthien ya Zole awa, me monisa na beto), lendaka bumba ilungi ya yandi na kimuntu, mbala yikwa yina ya Kimpeve ke vwanda na nkembo mingi mpe ke bumbama na mumpuni na ntuala yawu monisama pwelele na yandi! Mbala yikwa bawu ke bokila. . . Moise vwandaka muntu ya ngitukulu. Mbala yikwa bawu ke bokila beno, bayina me pasula vwale, mpe me kota na Dikunzi ya Tiya, mpe me basika na Lusakumunu! Mpe ntangu yayi ya me bumbama na beno. Bantu lunga mona yawu ve. Bawu lunga bakula Yawu ve.

¹⁰⁶ “Kana ya kimuntu vwandaka na nkembo, mbala yikwa yina ya mazulu ke vwanda ya kulutula nkembo! Kana ya kimuntu, yina vwandaka na nsuka, yawu vwandaka na nkembo, mbala yikwa Yayi ke na nsuka ve, ke vwanda na nkembo!”

¹⁰⁷ Kasi, tii na ntangu yayi, Yawu me bumbama. Yawu me bumbama ve na mukwikidi, kasi na mumpani. Yandi lunga mona Yawu ve. Ntangu nionso Nzambi ke kukibumba Yandi mosi na mumpani. Binkulu ke bumba Yawu. Mutindu bawu salaka na ntangu me luta, bawu ke sala yawu bubu yayi.

¹⁰⁸ Yawu vwandaka vwale ya kimuntu yina beto ke na yawu na ntangu yayi, sika wapi vwandaka vwale ya kimuntu. Bawu me ndimisama na profete yina vwandaka na Ndinga yina me sonama, muntu yina ke pesaka profesi, muntu yina ke kwisa na Ndinga yina me sonama, samu na kuzabisa Yawu.

¹⁰⁹ Bawu zabaka ti Ndinga vwandaka kuna, kasi bawu zabaka ve yina Yawu vwandaka tuba. Mpe Moise zabisaka Yawu. Yandi tubaka, “Musiku ke tuba *Yayi*, mpe *yayi* ke samu.” Yandi monisaka Yawu pwelele. Mpe na ntwala Yawu monisama pwelele, Yawu vwandaka ya kubumbama.

¹¹⁰ Mpe yawu ke mutindu mosi, bubu yayi, ya bumbama na bantu, tii kuna Yawu me monisama pwelele mpe me zabisama pwelele na bantu. Nzambi, Nzambi ya ngolo, me bumbama na nzutu ya muntu, Ndinga. Beno bambuka. Ntangu yayi beto ke mona ti Yawu vwandaka ya kubumbama na mumpani, kasi monisamaka pwelele na mukwikidi.

¹¹¹ Beno tala, Moise lendaka kota na Dikunzi ya Tiya, yandi mosi kaka. Muntu mosi ve lendaka kwenda na yandi. Yawu vwandaka ve . . . yawu . . . Yinki yina zola tuba na beto? Ti beno lenda kwisa na *Yayi* ve na nzila ya kukuma mosi ya kimvuka ya ba Pentecotiste. Beno me mona? Yandi me monisaka Yawu ata fioti ve na kimvuka mosi. Yandi ke monisaka Yawu kaka na muntu mosi. Mpe yawu ke mutindu yina bubu yayi. Beno ke tuba, “Mu ke na dibuundu mosi. Mu—mu ke na *yayi*.” Kasi yina ke sala kima ve. Beno me mona?

¹¹² Mpe muntu yina lendaka meka na kulanda Moise, samu na kumekula yawu, yandi fwaka. Mpe yawu ke mutindu mosi bubu yayi, lufwa ya kimpeve, kumeka na kumekula yawu. Yawu yina ke . . .

¹¹³ Na nkokila yayi, yawu yina beto zola tubila, ti yawu yina ke salama na kati ya bimvuka, bambandu ya kimuntu; muntu mosi ke meka na kukifwanikisa na Yawu, mpe ke meka na kuzinga luzingu mosi ya luswaswanu; yandi lunga nwa malafu, yandi lunga nwa makaya, bakento lunga zinga konso . . . konso mutindu yina bawu me zola, mpe kusala mutindu yinza ke sala, mpe kubikala na yinzo samu na kutala television, mpe bima ya yinza, mpe bawu mosi ke kukibokila ba Pentecotiste. Bawu ke meka na kumekula kima yina ya kisina. Yawu me monisamaka pwelele na bawu, ntete ve. Na ntangu Yawu me monisama pwelele, ya ke ya nkembo, kima mosi ke basisa yawu na beno mpe na ntangu beno ke kota Kuna. Beno ke kuma vwale mosi. Yawu ke . . . Ya ke sala ve. Mpe kumekula Yawu vwandaka lufwa.

¹¹⁴ Vwale ya Moise; yandi vwandaka Ndinga ya moyo samu na bantu. Mpe bubu yayi, bantu yina ke na vwale bawu ke mutindu mosi. “Bawu ke mikanda yina me sonama, mpe yina ke tangama na bantu nionso.” Mukanda ya *malu-malu* ve; kasi Mukanda yina me sonama, yina me monisama pwelele. Ya ke—ya ke bayina ke kwikila na Ndinga mpe nsilulu ya bubu yayi, ti Nzambi ke mwangisa Mpeve ya Yandi, na zulu ya bantu nionso, mpe yawu yina ke mikanda yina me sonama. Mpe na ntangu muntu mosi ke meka na kumekula yawu na kimuntu, yawu ke vutukila yandi. Luzingu ya beno ke talisa yina beno kele.

¹¹⁵ Kuvwandaka na mwana-bakala mosi na ntangu mosi, yandi kotaka na mpasi. Yandi vwandaka mwana-bakala mosi ya mbote, kasi yandi—yandi kwendaka na sika ya lusambusu. Mpe zuzi tubaka, “Mu ke mona ti nge ke ya kubwa. Mu ke pesa nge ndola ya boloko.”

¹¹⁶ Yandi tubaka, “Mu zola zonzila diambu ya munu.” Yandi tubaka, “Mu zola zonzila nkadulu ya munu ya mbote.”

¹¹⁷ Yandi tubaka, “Nge ke na nkadulu ya mbote ve. Nkadulu ya nge yawu yina ke bedisa nge.”

¹¹⁸ Mpe ya ke mutindu yina bubu yayi, kikuma yawu yina dibuundu ke kwenda na ntwala ve mutindu yawu lunga vwanda. Yawu ke nkadulu. Yawu ke luzingu. Beto kukipesa ya muvimba. Beto kwikila konso Ndinga ya Nzambi. Beto sala nionso ti Ndinga yina kukuma ya kieleka samu na beto. Beno me mona? Beno me mona? Nkadulu yawu yina ke sala ti beto kota kuna ve.

¹¹⁹ Kasi, na ntangu mosi, (samu na kumanisa dibanza yayi), na kisika yina ya lusambusu, mwana-bakala yango vwandaka na mbongo ve. Yandi lendaka futa yawu ve. Kitumbu vwandaka ya mafunda ya ba dollars. Kasi yandi vwandaka na mbuta ya yandi yina kwisaka mpe futaka yawu samu na yandi.

¹²⁰ Ntangu yayi, beto ke na Mbuta mosi, Yesu, Mwana ya Nzambi. Mpe Yandi kwisaka samu na kufuta yawu samu na beto, kana beto kwikila yawu mpe ke na kiyeka ya kukota na Yandi na vwale. Mutindu, Yandi ke Moise ya beto. Yesu ke Moise ya beto bubu yayi. Moise, ya kubumbama, vwandaka Ndinga ya moyo samu na bantu. Bubu yayi, Yesu, ya kubumbama, kele Ndinga ya moyo samu na bantu, ti, Yesu ke na kati ya Dibundu. Mpeve-Santu, Mwana ya Nzambi na kati ya bantu, ke monisa Ndinga na nzila ya nsilulu ya bubu yayi, ya ke sala Yawu ya kieleka. Mutindu mosi bubu yayi.

¹²¹ Mpe beno bambuka moyo ti, Moise salaka yayi, mpe monisaka yayi, na yinza ya muvimba ve, kasi na bantu yina salaka exode, kaka kimvuka ya bantu ya mutindu mosi, bayina salaka exo- . . . na exode mosi.

¹²² Mpe bubu yayi, Mpeve-Santu, na ntwala ya bantu yina ke tuba, “Kubeluka ya Kinzambi kele ya kieleka ve.” Na ntangu mu vwandaka yufula . . .

123 Kilumbu mosi, munganga mosi bokilaka munu, samu mama mosi ya leke, oh, yawu vwandaka na mambu yiya to tanu kuna, ya bantu yina vwandaka pene-pene ya lufwa, bayina bawu pesaka mwa bangunga ya kuzinga, kasi Mpeve-Santu belusaka bawu. Munganga vwandaka tula ntembe na yawu. Yandi tubaka, “Yinki mutindu yayi lunga salama? Samu na yinki,” yandi tubaka, “Mu—mu . . . Yina ke mbevo ya munu.”

124 Mu tubaka, “Yandi vwandaka. Kasi ntangu yayi yandi me kuma ya Nzambi. Yawu—yawu, yandi me kuma muntu ya Yandi ntangu yayi.” Beno me mona?

125 Mpe beno ke mona yina ke salama, ti Nzambi ke bokila bantu na kubasika, samu na kubasika na manima ya kitenda ya lele yina bantu ke mekula, mpe ke meka na kukota na dibuundu mosi; ba Methodiste ve, ba Baptiste, ba Presbyterien, bawu nionso kintwadi, kasi mabuundu ya ba Pentecotiste. Ya ke diambu ya muntu mosi. Nge na Nzambi. Beno kota kuna, kimvuka ya beno ve, dibuundu ya beno ve, pasteur ya beno ve, kasi ya ke beno yina fwana kota.

126 Mu zola ti beno bakula nkadulu yankaka ya Moise, ntangu yandi basikaka. Ata ti, yandi vwandaka profete, ata ti yandi vwandaka muntu mosi ya nene, na ntangu yandi basikaka na Ndinga, bantu monaka ti yandi sobaka. Kima mosi kumaka na yandi. Na ntangu yandi basikaka na Ndinga yina me ndimisama samu na ntangu yina, misiku, yandi vwandaka muntu ya kusoba.

127 Beno ke vwanda mpe mutindu yina, na ntangu beno ke basika na manima vwale yina ya kimuntu yina ke salaka ti beno seka lukutakanu ya mutindu yayi; yina ke salaka ti bantu kubula disakuba na kubeluka ya Kinzambi, mpe kutuba ti bilumbu ya bimangu me luta. Beno basika kaka na vwale yina ya kimuntu, vwale ya kinkulu, mpe muntu nionso ke zaba ti kima mosi me kuma na beno.

128 Mutindu mpangi ya beto ya luzitu, Jim Brown. Mu ke banza ti ba Presbyterien mingi zaba ti kima mosi me kuma na yandi, samu yandi—yandi basikaka na manima ya vwale ya kinkulu. Yandi monaka kima mosi na kati ya bantu, yina bendaka yandi, mpe yandi basikaka na manima ya vwale mosi.

129 Mbote, beno, na ntangu beno ke basika na manima ya vwale, na yina beno ke monana pwelele na ntwala ya bantu, bawu ke mona ti kima mosi me kuma na beno. Ndinga yina bumbamaka, na mumpani, kasi yina ke monana pwelele na mukwikidi. “Yesu Klisto mutindu mosi mazono, bubu yayi, mpe kukonda nsuka.”

130 Na yina, yawu vwandaka Nzambi. Na kilumbu ya bawu, yawu vwandaka Nzambi na kati ya Muntu, Mwana ya Yandi, Yesu Klisto. Beto ke kwikilaka na yawu. Kaka mutindu profete mosi ve, kaka muntu mutindu bantu nionso ve, mutindu bantu nionso. Yawu vwandaka Nzambi na kati ya Klisto; Nzambi na

kati ya Muntu; muvimba ya Bunzambi, na nzutu ya Muntu. Nzambi na kati ya Muntu!

¹³¹ Ya ke Nzambi na kati ya bantu ntangu yayi, Nzambi na muvimba ya Bunzambi, na nzutu ya Dibuundu ya Yandi nionso, ke kukitalisa Yandi mosi, mpe ke lungisa Ndinga ya Yandi.

¹³² Ntangu yayi beto ke mona ti, Nzambi, na bansungi nionso, yina vwandaka na mpusu na zulu ya Yandi. Yandi, Nzambi, bumbamaka na manima ya vwale.

¹³³ Ya ke bambukisa munu moyo ya mwa disolo mosi yina salamaka kuna na Sud. Kuna vwandaka na yinzo ya Muklisto mosi. Na yawu na yinzo ya Muklisto yayi bawu kwikilaka na Nzambi, mpe bawu—bawu vwandaka kwikila ti—ti Nzambi ke kebaka bawu na bampasi. Mpe, Yandi ke salaka, mutindu yina. Mpe bawu vwandaka na Junior ya leke, yandi vwandaka mwana bakala mosi ya leke ya bamvula sambwadi to nana. Mpe—mpe yandi vwandaka kwenda na lukolo ya Lumingu mpe yandi vwandaka mwana bakala mosi ya mbote. Kasi yandi vwandaka na boma ya mvula ya ngolo, mingi-mingi kana ya ke na banzasi.

¹³⁴ Mpe mu tubaka yawu na muntu mosi, kilumbu yina, na ntangu nsangu yayi ya muntu yina belukaka zabisamaka. Longi yayi tubaka, “Bantu ke sala nge nzambi, Mpangi Branham.”

¹³⁵ Mbote, yandi vwandaka muntu ya masawula, mu banzaka ti mu lungaka sukisa yawu, fioti. Samu na kulwadisa ve, beno zaba, kasi kaka mutindu. . . Mu tubaka, “Yina ke ntama na Masonuku ve, kana mu ke mutindu yina?” Beno me mona? Mu tubaka, “Ve, ya ke mutindu yina ve,” mu tubaka, “samu Yesu bokilaka ba profete ‘banzambi.’ Beno me mona? Yina ke kieleka, ‘Nzambi.’”

¹³⁶ Mpe bawu ke tuba, “Mbote, beno bantu ke baka kisika ya Nzambi.” Yina ke ntama mingi ve. Ya kieleka ya ke mutindu yina. Ya kieleka. Nzambi monisamaka pwelele na nzutu ya muntu, kaka mutindu Yandi silaka.

¹³⁷ Mwa dibuta yayi ya fioti, beto ke mona. Mu tubaka na yandi mwa disolo yayi ya fioti, yina me kwisa na mabanza ya munu kaka na ntangu yayi. Ti, na mpimpa mosi mvula mosi ya ngolo nokaka, mpe mama tubaka na Junior, yandi tubaka, “Ntangu yayi, mata nswalu, mwana, mpe kwenda lala.”

Yandi tubaka, “Mama, mu ke na boma,” yandi tubaka.

“Mpe kima mosi ve ke sala nge yimbi. Mata kuna mpe kwenda lala.”

¹³⁸ Junior yayi ya leke lalaka kuna na zulu, mpe yandi monaka bansemo pene-pene ya banela. Mpe mwa nkundi yayi ya fioti kotaka na kidi-kidi, mpe yandi bumbaka yintu ya yandi na kati bulanketi, mpe yandi vwandaka kuwa kaka banzasi, to vwandaka mona kaka bansemo na banela, mpe—mpe vwandaka kuwa makelele ya banzasi. Na yawu yandi tubaka, “Mama!”

Mpe yandi tubaka, “Yinki nge ke zola, Junior?”

Yandi tubaka, “Mata awa mpe beto lala.”

139 Na yawu yandi mataka na kikadi, mutindu mama nionso ya mbote, mpe ya lutondo lendaka sala. Mpe yandi mataka kuna, mpe yandi bakaka Junior yayi ya leke na maboko ya yandi. Mpe yandi tubaka, “Junior, mama zola tuba na nge na mwa ntangu fioti.”

Yandi tubaka, “Mbote mingi, mama.”

140 Yandi tubaka, “Bambuka yayi ntangu yayi. Beto ke kwendaka na yinzo-Nzambi, ntangu nionso. Beto ke tangaka Biblia. Beto ke sambilaka. Beto ke dibuta mosi ya Baklisto. Beto ke kwikilaka na Nzambi.” Mpe yandi tubaka, “Beto ke kwikilaka ti, mvula ya ngolo mpe nionso yina ke kwisa na ntwala, Nzambi ke mukengi ya beto.”

141 Yandi tubaka, “Mama, mu ke kwikila nionso yina. Kasi,” yandi tubaka, “kasi nsemo yina ke pene-pene mingi,” yandi tubaka, “Mu—mu ke zola Nzambi Yina me lwata mpusu.”

142 Na yawu, mu—mu banza ti, Junior kaka ve, kasi beto nionso ke na nsatu yina. Na ntangu beto ke vukana, na ntangu beto ke sambila samu na bamosi na bayankaka, Nzambi Yina me lwata mpusu.

143 Mpe beto ke mona awa ti Nzambi ke vwandaka na mpusu na zulu ya Yandi. Na ntangu Moise monaka Yandi, Yandi vwandaka na mpusu na zulu ya Yandi, kaka mutindu Muntu. Na ntangu Nzambi vwandaka na manima ya barido, Yandi vwandaka na mpusu na zulu ya Yandi. Mpe Nzambi, na nkokila yayi, na kati ya Dibuundu ya Yandi, me bumbama na kati ya Dibuundu ya Yandi na mpusu na zulu ya Yandi. Yandi ke kaka Nzambi mosi yina, na nkokila yayi. Beto ke mona mutindu yina.

144 Kasi ntangu yayi, mutindu na bantangu nionso, vwale ya mpusu kele yina ke bumbaka binkulu. Bawu lungaka kwikila ve ti yina ke Nzambi ke sala ti bantu kuzinga mutindu yina. Beno me mona? Ya ke samu Nzambi me bumbama na kati ya Dibuundu ya Yandi, na mpusu, Yina me lwata mpusu. Ya kieleka. Yandi me bumbama na mumpani, mpe me monika na mukwikidi. Yinga, tata.

145 Ntangu yayi, na ntangu vwale ya bawu ya kinkulu, binkulu ya bambuta mpe zengana, na Ndinga, oh, ya kieleka, bubu yayi, yawu me kuma pwelele ti, beto ke mona Yandi, Bunzambi yina me bumbama na nzutu ya muntu. Ba Hebreux 1 ke tuba mutindu yina.

146 Mpe Genese 18. Beno bambuka moyo ti, Nzambi vwandaka Muntu, yina telemaka kuna, ke dia, mpe ke solula na Abraham, mpe tubaka na Sarah yina yandi vwandaka sala na kati ya tenta na manima ya Yandi.

¹⁴⁷ Mpe Yesu tubaka, “Mutindu yawu vwandaka na bilumbu ya Sodome, mutindu mosi ya ke vwanda na Kwizulu ya Mwana ya muntu.” Buzambi yina me bumbama diaka na nzutu ya muntu! Ntangu yayi, beno bambuka moyo ti, Yesu tubaka ve ti, “Na ntangu Mwana ya Nzambi ke monisama pwelele.” Na kapu 17 ya Luc, mu banza, mpe na nzila ya 20, 21, kisika mosi kuna, Yandi tubaka, “Mpe na ntangu Mwana ya muntu ke monisama pwelele.” Mwana ya muntu, ke vutuka diaka na—na—na Dibuundu, mpe ke monisama pwelele na nzutu ya bantu; Mwana ya Nzambi ve, kasi Mwana ya muntu diaka, ke vutuka diaka na Dibuundu ya Yandi, na bilumbu ya nsuka. Beto ke mona ti Yandi silaka yina na bansilulu ya Nzambi.

¹⁴⁸ Beto ke bakula kima yankaka, na Ngwisani ya Ntama. Mu ke na Masonuku awa, na Exode. Ti, bampusu ya nkulu ya baniama, yinki vwandaka mfunu ya yawu? Yawu vwandaka bumba Nkembo ya Nzambi na ntwala ya bantu. Bampusu ya baniama; kikuma yawu yina bantu lendaka mona Yandi ve, samu mpusu yina bumbaka Yandi. Mpusu vwandaka. . . Nkembo ya Nzambi vwandaka na manima ya mpusu.

¹⁴⁹ Mpe ntangu yayi Nkembo ya Nzambi keke na manima ya mpusu ya beno. Ya kieleka. Mpe binkulu ke mona Yandi ve. Yandi ke na kati ya vwale, sika wapi vwandaka Ndinga ya Yandi.

¹⁵⁰ Yinki vwandaka na kati ya mpusu yina kuna na manima, bampusu ya nkulu ya baniama?

¹⁵¹ Yina ke, “Yandi vwandaka na kitoko ve samu bawu zola Yandi. Mpe na ntangu Yandi kumaka muntu mpe zingaka na kati ya beto, Yandi vwandaka na kitoko ve ti bawu lendaka zola Yandi.”

¹⁵² Mpe ntangu yayi ya ke mutindu mosi bubu yayi. Ya ke na kima mosi ve na bakala to na kento mosi, yina ba lunga sepela na yawu. Kasi yina me bumbama na kati. Yawu yina ke na mfunu. “Mbote,” beno ke tuba, “mwana-bakala yina, mu zaba ti yandi vwandaka kinwa-malafu. Yandi salaka yayi.” Mu ke tala ve yina yandi vwandaka sala. Yinki me bumbama na manima ya mpusu yina? Yinki ke na manima kuna, yawu yina ke na mfunu. Kikuma yawu yina, meso ya bantu me fwa. Mpusu ke fwa meso ya bantu. Beno me mona? Bawu ke tuba, “Mu ke bambuka moyo na yina kento yina vwandaka sala.” Mu zaba yina yandi vwandaka sala, kasi yinki ntangu yayi? Beno me mona?

¹⁵³ Bampusu ya bawu, yina vwandaka bumba baniama, kasi ntangu yayi yawu ke bumba Nkembo ya Nzambi, Yandi me vwanda na manima ya yawu. Yawu vwandaka na zulu ya niama, kasi ntangu yayi yawu ke bumba Nkembo ya Nzambi.

¹⁵⁴ Mpe na yawu mpusu ya beno lunga soba, na nkokila yayi, samu na kuvwanda yinzo ya Nzambi, samu Nzambi kuzinga na kati ya bantu.

155 Tala. Bampusu ya nkulu ya baniamama, beto ke mona ti, na manima vwandaka. . . Ndinga vwandaka kuna na kati. Mpe, Ndinga, ya vwandaka diaka na dimpa ya munkayulu. Ba vwandaka losa masa na sanduku. Mpe yinki vwandaka kuna? Nkembo ya Shekinah vwandaka kuna na kati.

156 Ntangu yayi, Ndinga ke Mbama, mpe Yawu lunga buta mbama ve tii kuna She- . . . Mwini ke bula Yawu. Tii kuna Mwini ke kwisa na zulu ya yawu, samu Yawu pesa, samu Yawu buta Mbama. Mpe yina ke nzila mosi kaka. Beno baka Ndinga, beno me mona, beno baka Ndinga ya Nzambi na kati ya bantima ya beno, mpe beno tambula na kati ya Nkembo ya Shekinah. Mpe na ntangu beno ke sala yawu, Yawu ke nata dimpa ya munkayulu, Mana, yina me pesama kaka na bantu yina me kabwana. Bantu mosi kaka lunga dia yawu, muswa me pesama na bantu mosi kaka na kudia yawu, ke kaka bantu yina ke na muswa mpe zaba Yawu. Paul ke tuba awa, “Bayina me sobaka Nkembo na Nkembo.” Beno me mona, na nsuka, Yawu ke kwisa tii kuna mpe Yawu ke vutuka na Nkembo ya Yawu ya kisina.

157 Yawu ke kaka mutindu mosi na mbama ya nkembo ya suka. Mbama ya felele mosi, ke bwa na ntoto. Mbama ya disangu ke bwa na ntoto. Yinki ke diambu ya ntete? Yawu ke basika, mpe ke yela. Na yina yawu ke basisa matiti. Na yawu, kubanda na matiti, yawu ke vutuka kuna na mbama ya kisina.

158 Mbote, ya kieleka yawu yina Dibundu salaka. Yawu me katuka na Luther, Wesley, mpe ntangu yayi yawu ke vutuka na Mbama ya kisina, ya ke vutuka na Nkembo ya Yawu ya kisina, mpe ke vutuka na Nkembo yina Yawu vwandaka na yawu na mbatukulu. Mwini yina basikaka na Este, ya ke kaka Mwini yina ke monisa kima ya mutindu mosi na Weste, ke soba Nkembo na Nkembo. Yawu sobaka na mutindu ya kimumpuni, kuna na Luther; mpe na Luther, yawu kwendaka na Wesley; na Wesley, yawu kwendaka na Pentecote; mpe nionso yina, ke soba Nkembo na Nkembo, ya ke pesa Mana ya kubumbama.

159 Mpe ntangu yayi Yawu me yela, samu na kuvutula Yandi kuna mutindu Yandi vwandaka na mbatukulu, ministere ya Yandi yina kaka; Yesu yina mosi, ngolo yina mosi, Mpeve-Santu yina mosi. Mosi yina kulumukaka na Kilumbu ya Pentecote, ya ke kaka Mpeve-Santu yina mosi me monisama pwelele bubu yayi, Nkembo na Nkembo, tii na Nkembo. Mpe ya ke vutuka na Mbama ya Yawu ya kisina, na mbotika ya Mpeve-Santu; na bidimbu ya mutindu mosi, bimangu ya mutindu mosi, mbotika ya mutindu mosi; bantu ya mutindu mosi, yina ke zinga mutindu mosi, na ngolo ya mutindu mosi, na sasasio ya mutindu mosi. Yawu ke Nkembo na Nkembo. Mpe yina ke kwisa ke vwanda, “Yina me soba na Nkembo yayi, na nzutu yina me fwanana na nzutu ya Yandi Mosi ya nkembo, kuna beto ke mona Yandi.” Abraham monaka kima ya mutindu mosi.

160 Beno tala ntangu yayi. Beto ke mona yinki mutindu yawu sobaka. Kubanda na Calvaire, beto me bokilama na kumwangisa Nkembo ya Yandi. Ntangu yayi, na ba Corinthien ya Ntete kapu 12, “Beto me botama na Nzutu ya Yandi. Beto nionso me botama na Mpeve mosi.” Na “masa” mosi ve. “Beto nionso me botama, na Mpeve mosi.” Ntangu yayi, ya kieleka, na nzila ya yina beto me kuma kitini ya Yandi.

161 Mu banza ti mu ke baka beno ntangu ya yinda ve. [Dibuundu me tuba, “Ve.”—Mu.] Beno me mona? Mu banza ya ke mutindu yina ve.

162 Kasi, yawu ke mutindu musiki mosi ya nene yina ke bula, to yina ya bansaka.

163 Mu zaba mingi ve na yina me tadila musiki to bansaka. Kasi mu vwandaka tala nsaka yayi. . . Mu vwandaka tubila *Carmen*, sika wapi mwana ya munu ya kento mpe bayankaka vwandaka sakana. Mpe bawu—mpe bawu vwandaka sakana na musiki yayi, na *Carmen*. Bawu vwandaka tendula kima mosi. Musiki vwandaka—vwandaka—vwandaka tendula mpe kima mosi yina.

164 Ya ke mutindu mosi na ntangu beno me baka mbotika ya Mpeve-Santu, kati na Klisto.

165 Ntangu yayi, beno tala, mingi kati ya beno me tangaka to me waka disolo ya muyimbi-mikunga yayi ya nene ya Russie yina sonikaka *Pierre Na Kibulu*. Mpe yinki mutindu yandi, mpe bawu ke tendula yawu na bidimbu mpe nionso yina. Mpe muntu nionso yina zaba masolo, yina me tangaka yawu na zulunalu, mpe lunga wa musiki yina, mutindu yawu ke tendula, nsaka yina, mpe mutindu yawu ke bula, mpamba ve, bawu zaba nsobolo nionso. Beto lunga tala *awa*, mpe kumona nsobolo.

166 Kasi, ntangu yayi, yinki lungaka salama kana—kana muyimbi sonikaka kima mosi, mpe beto ke mona ti yawu ke tendusama mbote-mbote ve? Beto ke mona ti na yina kima mosi ke salama. Kima mosi ke kondwa, na ntangu beto ke mona yawu. Yandi yina salaka yawu mpe sonikaka yawu, mpe na ntangu musiki yina ke bula, mpe beto ke wa note ya yimbi. Kima mosi ke tambula mbote ve. Ntwadisi me twadisa mbote ve. Beno me mona?

167 Mpe yawu yina diambu bubu yayi, bampangi ya munu ba Lutherien, bampangi ya munu ba Baptiste, bampangi ya munu ba Pentecotiste. Bampangi ya munu na ba denomination nionso, beno tala yina ke salama. Beno me mona? Beno ke meka na kupesa note yina bulaka na bilumbu ya Luther, Wesley, mutindu yayi, mpamba ve, bubu yayi, Manaka ya misiki awa ke talisa ti yawu ke kilumbu yankaka. Beno me mona? Beno me mona? Beno me mona? Beto lunga zinga ve na nsemo ya Luther; yandi vwandaka reformatere. Beto ke sepela na kitini ya yandi—ya yandi, kasi beto lenda bula yawu diaka ve. Beto me kuma *awa*

na nsuka ya Buku ntangu yayi. Beno me mona? Beto lunga ve—beto lunga ve kubula Yawu mutindu yina.

¹⁶⁸ Ntangu yayi, mutindu mosi kaka beno lunga sala yawu ve, bampangi ya munu, kele yayi. Mpe bampangi ya munu na yinza, bisika nionso na yinza, mu lenda tuba ti, kele na mutindu mosi kaka samu na—samu na ntwadisi na kusala. Yandi kota kaka na Mpeve yina nsoniki vwandaka na yawu, na yina yandi ke baka Yawu. Mpe na ntangu Dibuundu, musiki Yawu mosi, na ntangu yinza ke vingila na kumona bidimbu mpe bimangu; ya ke na ntangu Dibuundu, mpe Nsoniki, mpe ntwadisi, bawu nionso ke kota na Mpeve ya Nsoniki.

¹⁶⁹ Na yawu na ntangu bawu ke tuba, “Bilumbu ya bimangu me luta,” yina ke bula note ya mbote ve.

¹⁷⁰ Kasi na ntangu beto ke kota na nzila ya Yawu ya kieleka, mpe Mpeve ya Yawu ya kieleka; yinki mutindu beno ke sala yawu kana Mpeve ya Nsoniki, me kulumuka na beno ve? Amen. Mpamba ve na ntangu yina beno ke tuba, “Bilumbu ya bimangu me lutaka ata fioti ve,” musiki ke bula, “Amen!” Na ntangu beto ke bula, mpe ke tuba, “Yesu Klisto ke mutindu mosi mazono, bubu yayi, mpe kukonda nsuka,” musiki ke bula, “Amen!” “Beno ke kuzwa ngolo na ntangu Mpeve-Santu ke kwisa na zulu ya beno.” Musiki ke bula, “Amen! Mu ke na Yawu!” Yawu ke mabanza diaka ve. Misiki nionso kele ya kusungama na Ndinga. Ya ke . . . [Mpangi Branham me bula maboko mbala tatu—Mu.] Yawu yina. Oh! Ya ke kima mosi ya kitoko mingi. Ntwadisi na Nsoniki fwana vwanda na Mpeve mosi. Mpe mutindu mosi bantu ya musiki fwana vwanda na Mpeve mosi, samu Yawu bula mbote-mbote. Mpe yinza ke kukiyufula yinki ke kwisa na ntuala.

¹⁷¹ Communisme yina bawu ke zonzila, mpe bawu me kumisa munu mbevo samu na yawu, kukota mpe nionso yina, mpe kukabwana. Oh, mawa! Mutindu, buzoba yayi nionso, na ntangu Kwizulu ya Mfumu me kuma pene-pene, kima mosi ke tambula mbote ve. Mu ke na boma ti ntwadisi ke . . . Bantwadisi me basika na nganda ya Mpeve ya Nsoniki.

¹⁷² Na ntangu beto ke kota na Mpeve ya Nsoniki, ngolo yina ya kisina ya Nzambi yina Biblia ke tuba, “Bantu ya ntama twadisamaka na Mpeve-Santu samu na kusonika Biblia,” beno ke mona ti mwa bitini yina zole ya ba Chinois ke kwelana, kaka mutindu Biblia ya Nzambi na mukwikidi ke vwanda kisika mosi, samu bawu zole kele na Mpeve mosi. Bawu ke kima mosi. Bawu ke fwanana. Yina beto ke na yawu nsatu bubu yayi kele bantwadisi, ya kieleka, yina ke vutula bantu na Ndinga, kuvutuka mpe kukwikila Yawu kaka mutindu Yawu ke tuba. Na yina beno ke mona Nzambi, Yandi mosi. Yawu yina kumonisama ya pwelele. Nsaka me kuma ya kieleka.

173 Bubu yayi, bawu ke tuba, “Mbote, Yandi ke Nzambi ya masolo. Beto zaba ti Yandi zabukaka Nzadi Mbwaki. Yandi salaka nionso *yayi*. Mpe Yandi vwandaka na dibulu ya tiya, na bana Hebreux.” Yinki mbote ke sala Nzambi ya masolo, kana yandi kele ve, kana Yandi ke mutindu mosi ve bubu yayi? Muntu ntangu nionso ke kumisaka Nzambi samu na yina Yandi salaka, yandi ke banza na yina Yandi ke sala, mpe ke zimbana yina Yandi kele na kusala. Muntu ke vwandaka kaka mutindu yina. Mpe ya ke mutindu mosi bubu yayi, bampangi ya munu. Ya kieleka ya ke mutindu mosi bubu yayi. Oh, la la!

174 Beto vutuka na manima mpe beto bula musiki mbote-mbote, na mutindu ti yinza kumona. Yesu tubaka, “Ntangu ba ke zangula Munu na ntoto, Mu ke benda bantu nionso na Munu.” Mpe, “Yandi ke mutindu mosi mazono, bubu yayi, mpe kukonda nsuka.”

175 Bika ti bantwadisi kukota na Mpeve ya kieleka, na bantu ya musiki mpe Nsoniki, bima nionso ke tambula mbote mingi. Na yina, beto ke vwanda na mabanza diaka ve, beto ke fwanana na Yandi. Hebreux 13:8 ke tuba, “Yandi ke mutindu mosi mazono, bubu yayi, mpe kukonda nsuka.”

176 Beto me fwanana na Yandi na Actes 2. Beto me fwanana na bawu, na mbotika mosi, kima mosi. Beto kele, nionso yina Yandi vwandaka mpe nionso yina Yandi kele, nionso yina Yandi vwandaka mpe nionso yina Yandi kele. Ya kieleka ya ke mutindu yina.

177 Ya ke kaka mutindu mosi kana mu zola vwanda Americain ya kieleka, mu ke fwanana na konso kima yina yandi vwandaka, mpe konso kima yina yandi kele. Mu ke fwanana na yawu, kana mu ke Americain ya kieleka.

178 Kana mu ke Americain ya kieleka, na yina mu kulumukaka na Plymouth Rock. Amen. Mu salaka yawu, kana mu ke Americain ya kieleka. Beno mpe; beno kulumukaka na Plymouth Rock na batata bizieti. Na Plymouth Rock, na ntangu bawu kwendaka kuna, mu vwandaka na bawu; beno mpe vwandaka kuna, beto nionso.

179 Mu mataka na mpunda na Paul Revere, na kati ya bala-bala, samu na kukebisa bawu na kigonsa. Yina ke ya kieleka.

180 Awa na Valley Forge, mu tambulaka na Delaware ya galasi, na nkonga ya basoda yina, ndambu ya bawu, vwandaka ve na basapatu na makulu. Mu sambilaka mpimpa ya muvimba na George Washington, na ntuala kuna. Mu tambulaka na Delaware na vision mosi na kati ya ntima ya munu. Beto ke ba Americain. Yinga, tata. Na Valley Forge, ya kieleka mu salaka yawu.

181 Mu vutulaka matondo na batata ya kisina na Kilumbu ya ntete ya kuvutula matondo. Mu vutulaka matondo na Nzambi.

Kana mu ke Americain ya kieleka, mu fwananaka na bawu na lukutakanu yina kuna.

182 Kana mu ke Americain ya kieleka, mu fwananaka na bawu na ntangu mu telemaka kuna pene-pene ya Stonewall Jackson.

183 Kana mu ke Americain ya kieleka, mu fwananaka na Boston Tea Party, yinga, tata, na ntangu beto mangaka na kuvunama. Mbote, mu ke Americain ya kieleka. Mu fwananaka na bawu kuna. Yinga, tata. Oh, la la!

184 Mu bulaka Ngunga ya Kimpwanza, na kilumbu ya 4 ya ntete ya Ngonda ya sambwadi, na mvula 1776. Mu bulaka Ngunga ya Kimpwanza awa mpe tubaka ti beto ke na kimpwanza. Mu salaka yawu, samu na kuvwanda Americain ya kieleka.

185 Mu fwananaka na nsoni ya yandi na Revolution yina, na ntangu mpangi-bakala nwanaka. Mu ke ndima nsoni ya yawu, mutindu mosi mu ke ndima nkembo ya yandi. Kana mu ke Americain, mu ke vwanda mutindu yina. Mu me fwanana na yandi. Yinga, tata.

186 Mu fwananaka na Gettysburg kuna, na ntangu Lincoln salaka nzonzolo ya yandi. Yinga, tata.

187 Mu vwandaka na Wake Island, na basoda yina vwandaka kuna na menga na nzutu ya bawu. Mu telemaka kuna na Wake Island.

Kuna na Guam, mu pesaka lusadusu samu na kumatisa drapeau.

188 Mu ke Americain ya kieleka. Amen. Mu ke, nionso yina yandi kele, mu ke na lulendo ya yandi. Yinga, mutindu yina. Nionso yina Amerique vwandaka, mpe nionso yina yandi kele, mu ke vwanda mutindu yina, kana mu ke Americain. Nionso yina yandi vwandaka, mu ke vwanda mutindu yina, samu mu ke fwanana na yandi.

189 Mutindu mosi, samu na kuvwanda Muklisto ya kieleka, beno ke fwanana na yawu.

190 Mu longaka na Moise, mpe ke-. . .to samu na Noé, mpe kebisaka bantu samu na lusambusu yina ke kwisa; samu na kuvwanda Muklisto ya kieleka.

191 Mu vwandaka na Moise na mulaka ya tiya. Mu monaka Dikunzi ya Tiya. Mu monaka Nkembo ya Yandi. Mu vwandaka na Moise kuna na ntoto ya kuyuma, samu na kuvwanda Muklisto. Mu ke fwanana na nionso yina Nzambi vwandaka, samu na kuvwanda Muklisto. Mu monaka nkembo ya Yandi. Mu waka Ndinga ya Yandi. Beno meka ve na kutuba na munu kima yankaka, samu mu vwandaka kuna. Mu zaba yina mu ke tuba. Mu monaka yina salamaka. Yinga, tata.

192 Mu vwandaka na Nzadi Mungwa, na ntangu mu monaka Mpeve ya Nzambi ke tambula kuna mpe ke telemisa masa na

lweka mosi; na zulu ya bayinti ve, mutindu bantu ke tubaka yawu bubu yayi, kasi na nzadi mosi ya mudindu mingi ya ba pied makumi yivwa [27 metres]. Mu monaka Mpeve ya Nzambi. Mu tambulaka na Moise na ntoto yina ya kuyuma, na kati ya Nzadi Mbwaki yina.

¹⁹³ Mu telemaka na zulu ya Mongo Sinai mpe monaka banzasi mpe nsemo ke bwa. Mu diaka Mana kintwadi na bawu kuna. Mu nwaka masa na Ditadi yina. Mu ke nwa yawu diaka na nkokila yayi. Mu me fwanana na bantu yina kudiaka Mana. Mu me fwanana na bayina nwaka masa na Ditadi yina.

¹⁹⁴ Mu me fwanana na bawu diaka na ntangu Josué bulaka mpungi, mpe bikaku ya Jerico kubwaka.

Mu vwandaka na dibulu ya bankosi na Daniel.

Mu vwandaka na dibulu ya tiya na bana Hebreux.

Mu vwandaka na zulu ya Mongo...na Elie na Mongo Carmel.

¹⁹⁵ Mu vwandaka na Jean Baptiste, mpe na ntwala ya bantu ya masawula yina. Mu monaka Mpeve ya Nzambi ke kulumuka. Mu waka Mpeve ya Nzambi ke tuba, “Yayi ke Mwana ya Munu ya luzolo na Yandi Mu me sepela na kuzinga.” Yinga, tata. Ya kieleka mu fwananaka na yandi. Ya kieleka yina ke ya kusungama.

¹⁹⁶ Mu fwananaka kuna na ntoni ya Lazare, na ntangu Yandi vumbulaka Lazare na lufwa. Mu fwananaka, na kento yina na dibulu ya masa, na ntangu Yandi tubaka na yandi masamu ya yandi. Yinga, tata.

¹⁹⁷ Ya kieleka mu fwananaka na Yandi na lufwa ya Yandi. Mpe mu fwananaka na Paki ya ntete. Mu vumbukaka na lufwa na Yandi. Mu me fwanana na Yandi na lufwa ya Yandi.

¹⁹⁸ Mu vwandaka na bantu nkama mosi na makumi zole, na yinzo yina ya zulu. Mu fwananaka na bawu kuna na zulu. Hey! Mu—mu ke wa nsatu ya bunzambi. Oh, la la! Mu fwananaka na bawu kuna. Mu ke mosi ya bawu. Mu fwananaka na bawu. Mu bakaka nzingilu ya mutindu mosi na bawu. Mu vwandaka kuna na ntangu yawu salamaka, samu na kuvwanda Muklisto ya kieleka. Mu vwandaka mhangi ya kwizulu ya Mupepe yina ya ngolo mingi. Mu vwandaka mhangi ya yawu. Mu waka ngolo ya Nzambi mutindu Yawu ningisaka. Mu vwandaka na bayina tubaka bandinga ya malu-malu. Mu waka kupakulama yina kwisaka kuna. Mu vwandaka na bawu. Mu fwananaka na bawu na ntangu Mpeve-Santu bandaka na kutuba na bawu, na bandinga ya malu-malu.

¹⁹⁹ Mu vwandaka na Pierre, na ntwala ya bantu ya masawula yina na Actes 2, na ntangu yandi longaka dilongi ya nene yina yandi longaka. Mu fwananaka na bawu. Yinga, tata.

²⁰⁰ Na Actes 4, na ntangu bawu vwandaka kisika mosi, mu vwandaka na bawu na ntangu yinzo kuninganaka. Na manima lukutakanu ya bisambu, yinzo kuninganaka sika wapi bawu vwandaka. Mu fwananaka na bawu kuna.

Mu longaka na Paul na Mongo ya Mars. Yinga, tata.

²⁰¹ Mu vwandaka na Jean na Kisanga ya Patmos, mpe monaka Kwizulu ya Yandi ya zole.

Mu vwandaka na Luther na ntangu ya kusungika.

²⁰² Mu vwandaka na Wesley, dikala mosi ya tiya; yina ba me basisa na tiya, na ntangu ya mvita yina ya nene ya dibuundu ya Angleterre. Mu vwandaka kuna na yandi.

²⁰³ Mpe mu ke awa na nkokila yayi, na mvula 1964, na Philadelphie, Pennsylvanie, samu na kufwanana na kimvuka ya mutindu mosi, na nzingilu ya mutindu mosi. Mu ke vwanda mutindu yina, kana mu ke Muklisto. Mu ke vwanda sika wapi Ndinga ya Nzambi me monisama pwelele. Mu ke fwanana na kimvuka yina ke wa Mpeve ya Nzambi.

²⁰⁴ Mu ke fwanana na kimvuka yina ke zaba ti Yandi me monisama pwelele, yina zaba ti Yandi ke mutindu mosi mazono, bubu yayi, mpe kukonda nsuka, yina zaba ti Yayi ke kifanatiki ve. “Yawu ke Yesu Klisto mutindu mosi mazono, bubu yayi, mpe kukonda nsuka.” Mu me fwanana na kimvuka yayi awa, na nkokila yayi. Na ntangu, ba ke bokila bawu nkangu ya bantu ya ba eretiki, nkangu ya bafanatiki, samu na Ndinga ya Nzambi. Kasi, “Mu ke na nsoni ve ya Nsangu ya mbote ya Yesu Klisto, samu Yawu ke ngolo ya Nzambi samu na mpulusu ya bawu,” mpe mu ke mosi ya bawu. Mu ke na mikanda ya moyo yina mu ke tubila, yina ndimisamaka, na Nzambi yina me bumbama na kati ya bantu, na babakala mpe bakento. Oh!

²⁰⁵ Nzambi na kati ya *en morphe* ya Yandi diaka, yina me kukimonisa Yandi mosi mpe me kukitalisa Yandi mosi na bantu ya Yandi. Ntinu ya nene Yina bikaka Nkembo ya Yandi. “Kaka na ntangu fioti yinza ke mona Munu diaka ve. Mu ke bumbama samu na bawu. Kasi beno ke mona Munu, samu Mu ke vwanda na beno, ata ti na kati ya beno, tii na nsuka ya ntoto, ke soba kubanda na Luther tii na Wesley, mpe nionso yina, Nkembo na Nkembo. Mu ke kaka Nzambi yina ke zinga, mpe ke vutuka na Nkembo yina ya kisina.” Alleluia!

²⁰⁶ Yandi pasulaka vwale nionso ya denomination, konso kikaku ya ndinga. Ndinga yina ke tuba, “Oh, yina ke kifanatiki,” Yandi pasulaka yawu. Ndinga ke basika kuna, mpe ke tuba, “Oh, bantu ya bawu ke maboma,” Yandi pasulaka vwale yina. Yinga, Yandi salaka yawu. “Oh, beno lunga sala yawu ve. Beno ke kima yankaka ve kasi nkangu ya bafanatiki.” Yandi pasulaka yawu. “Kele na kima ya mutindu yina ve mumbandu kubeluka ya Bunzambi.” Yandi pasulaka yawu, oh, la la, samu Ndinga

ya Yandi ke tuba ti Yandi lenda sala yawu. Beno lenda nunga Ndinga ya Nzambi ve.

207 Mpe Yandi me telema kuna, diaka, na nkokila yayi, Munungi-mvita ya ngolo, kubanda Yandi bukaka konso Methodist, Baptiste, Presbyterien, konso vwale yina. Yandi me telema na kati ya bantu ya Yandi, na nkokila yayi, yina ba lenda nunga ve na binkulu. Beno bika bantu kutuba yina bawu zola, bawu sala yina bawu zola, nionso yina bawu zola sala. Nzambi ke kwisa, mpe ke buka ndinga ya kikaku yina.

208 Mpe beno bambuka moyo, bawu tubaka na munu ti, na ntangu avion ke buka ndinga ya kikaku yina, ke vwanda diaka ve na nsuka na mbangu ya yawu.

209 Mu ke tuba na beno ti, na ntangu beno me buka kikaku yina ya kinkulu, ti “Yesu vwandaka mutindu yina, mpe Yandi ke mutindu yina ve na ntangu yayi,” na ntangu beno ke mona ti Yandi ke mutindu mosi mazono, bubu yayi mpe kukonda nsuka, kele na nsuka ve na yina Nzambi lenda sala na lukutakanu yayi awa, mpe kutalisa na yinza yayi yina ba ke na yawu nsatu: kutalisama ya yinza ve, kasi yinza ya reveil yina ke fuluka mpe ke botama na Ntwala ya Nzambi ya moyo, *en morphe* ke kukimonisa Yandi mosi na nzutu ya bantu. Alleluia! Mu ke kwikila yawu.

210 Konso me pasuka kikaku, konso vwale, konso vwale! Kima mosi ve ke bumba Kuvwanda ya Yandi na ntwala ya beto. Na ntangu bantu ke na nzala na kati ya bantima ya bawu, kele na vwale mosi ke pene-pene na kupasuka. Beno lunga tula ntima na yina ve. Beno pasula bavwale nionso, na Mpeve-Santu ya Yandi ya nene!

211 Mpe Yandi me telema awa, na nkokila yayi, Munungi-mvita ya ngolo, mutindu mosi mazono, bubu yayi mpe kukonda nsuka; ke belusa bambevo, ke botika bakwikidi, kaka mutindu Yandi salaka ntete. Yandi ke munungi-mvita ya ngolo. Bampeve ya yimbi yina bedisamaka ke tina ntama. Yinga, tata. Ba ke salaka yawu kaka, na ntangu Yandi ke pene-pene.

212 Samu na kusukisa, mu zola tuba yayi. Kuvwandaka. . . Mu tangaka disolo mosi, bamvula mingi me luta, samu na yina me tadila mubudi-violon mosi ya nkulu. Yandi vwandaka na violon mosi ya nkulu yina ba zolaka tekisa. Beno me waka ntete disolo yina, na bambala mingi. Bawu zolaka tekisa yawu samu na kima mosi. Mpe muteki tubaka, “Nani ke pesa munu *yayi mpe yina?*” Mu banza bawu pesaka yandi mwa mpata, mbala yankaka, bampata makumi tanu, to kima ya mutindu yina. “Mbala mosi, mbala zole, . . .”

213 Na mbala mosi, muntu mosi telemaka kuna na manima. Yandi tubaka, “Mwa muniti fioti.” Mpe yandi pusanaka mpe bakaka yawu. Beto banza ti yandi bulaka yayi:

Kele na Kiziba mosi ya kufuluka na Menga,
 Yina basikaka na misisa ya Emmanuel;
 Na ntangu bansumuki ke kota kuna,
 Bawu ke zimbana masumu ya bawu.

214 Na yina na ntangu yandi kitisaka yawu, kuvwandaka na disu mosi ve ya kuyuma. Na yina yandi tubaka, “Nani ke pesa yawu?”

215 Muntu mosi tubaka, “Bamafunda tanu.” “Bamafunda kumi.” Yawu vwandaka na ntalu ya fioti. Samu na yinki? Longi yayi ya mbuta ya violon monisaka ntalu ya yawu ya kieleka.

216 Oh, mpangi-bakala, mpangi-kento, beno bika ntangu yayi Longi ya Ndinga yayi, Yina sonikaka Yawu, Mpeve-Santu ya nene, kubula colophane ya zola ya Yandi, mpe kubenda yawu na ntima ya yandi.

Kele na Kiziba mosi ya kufuluka na Menga,
 Yina basikaka na misisa ya Emmanuel.

217 Beno ke mona ntalu ya yawu ya muvimba, mpe beno ke mona Nzambi yina me monisama pwelele. Ti, Yandi ke kaka mutindu Yandi vwandaka na ntangu Yandi kulumukaka na Kilumbu ya Pentecote, na zulu ya bantu, na ntangu Yandi kumaka *kenos* Yandi mosi, “kukikotisaka ya muvimba” na kati ya Yawu. Ya kieleka.

218 Beno ke tuba, “Mpangi Branham, mu mekaka. Mu mekaka. Mu salaka *yayi, yina, mpe yankaka.*”

219 Kilumbu mosi mu vwandaka na lukutakanu mosi na Carlsbad, na New Mexico. Mpe beto kulumukaka kuna na kisika yayi ya nene ya ngembo. Mpe yawu vwandaka pesa boma, mpe beto kulumukaka kuna. Mpe bakala yina, na ntangu yandi kotaka na kisika yina kuna, yandi—yandi fwaka bamwinda nionso. Mpe, oh, la la, beno lunga banza yinki mutindu yawu vwandaka mpimpa. Ya ke kaka... Yawu vwandaka mudidi mingi ti beno lungaka simba yawu.

220 Mpe yina ke monana mutindu mosi na bantangu yayi, na ntangu beto ke mona dibuundu ke zimbana na kundima Ndinga ya Nzambi; na ntangu beno ke mona bana ya beto ya bakento ya Sion ke sala yina bawu ke sala; na ntangu beto ke mona bampangi ya beto ya babakala ke nwa malafu mpe makaya, mpe—mpe ke sala bansaka ya mvindu mpe bima nionso yina, mpe ke meka na kutuba kaka ti bawu ke na Klisto. Oh, la la, yawu ke mpimpa mingi. Yawu ke mudidi mingi.

221 Beto ke mona kidimbu ya Kwizulu ya Yandi. Ya ke vwanda... Ya ke vwandaka ntangu nionso mpimpa mingi na ntwala tongo kutana. Na yina Mbwetete ya Suka ke basika samu na kupesa mbote na kilumbu, mpe munati-nsangu, mpe ke zabisa kwizulu ya yawu. Beno bambuka yawu.

222 Kuna na kati, na ntangu bawu fwaka mwinda, vwandaka na mwana-kento mosi yina bandaka na kuboka na ndinga ya ngolo.

Kuvwandaka na mwana-bakala mosi pene-pene ya ntwadisi, mpe yandi monaka mutindu ntwadisi yina vwandaka kufwa mwinda yina kuna. Mpe mpangi-kento yina vwandaka pene-pene ya kukota na kidi-kidi. Yandi vwandaka boka, mpe ke pamuka na zulu mpe na ntoto. “Oh! Yinki ke salama? Yinki ke diambu? Yinki ke diambu?”

223 Beno zaba mutindu yandi bokaka? Yandi tubaka, “Beno vwanda na boma ve, mpangi-kento ya leke. Kele na muntu mosi awa yina lunga pelisa mwinda.”

224 Wa, mpangi-kento, beno lunga banza ti beto ke fioti mpe kimvuka ya fioti. Kasi, beno vwanda na boma ve. Kele na Muntu mosi awa Yina lunga pelisa Mwinda. Ya ke Mpeve-Santu. Beno ke kwikila yawu? [Dibuundu me tuba, “Amen.”—Mu.]

225 Beto kulumusa bayintu ya beto samu na mwa ntangu fioti. Mu lemvo ya beno samu mu me baka beno ntangu ya yinda.

226 O Nzambi ya nene ya Zulu, Nge mosi ke kukimonisa, Nge mosi ke kukitalisa, Nge mosi ke kukizabisa, Ntinu ya nene ya Nkembo, baka mwa bambandu yayi, na nkokila yayi, mpe kotisa yawu na bantima ya bantu. Bika ti beto mona Yina me monisama pwelele, Mosi Yina kwisaka mpe pasulaka vwale ya tempelo; mpe basikaka na vwale yina, mpe kwisaka na ba vwale ya kimuntu diaka, na Kilumbu ya Pentecote; ya ke kaka mutindu mosi, ke soba Nkembo na Nkembo.

227 Mpe ntangu yayi beto me vutuka kaka mutindu yinza, ke sala, ya ke vutuka na Mbuma ya kisina, kubanda na nsungi ya dibuundu mosi na yankaka. Mpe na nsungi yayi ya nsuka awa, sika wapi beto kele, ya ke vutuka na Kima mosi ya kisina yina kulumukaka na Kilumbu ya Pentecote, samu na kulungisa Masonuku, “Nsemo na ntangu ya nkokila,” mpe, “Beno mpe ke sala bisalu yayi Mu ke sala,” mpe bima mingi yina Nge silaka na Ndinga ya Nge.

228 Tata, kana kele na mosi awa yina me pasulaka ntete ve vwale yina, to kana kele na mosi awa yina ke mekula muntu yina lutaka na vwale, wila yandi mawa na nkokila yayi, Tata. Bika ti bawu mona Munungi-mvita ya nene yina me telema awa, ya kifuluka na lemvo mpe ngolo, samu na kupesa lemvo ya masumu. Pesa yawu, Tata.

229 Mpe na ntangu beto me kulumusa bayintu ya beto, lenda vwanda na bantu awa? Yikwa, mu lunga tuba, yina zola tuba, “Mpangi Branham, mu me telemisa diboko ya munu. Sambila samu na munu”? Beno kulumusa kaka bayintu ya beno, mpe beno telemisa diboko ya beno, “Mu ke zola pasula konso vwale, tii kuna mu lunga mona Munungi-mvita.” Nzambi sakumuna beno. Oh, la la, maboko yayi nionso! Kuna na balcon, na diboko ya kibakala? Nzambi sakumuna beno. Na balcon kuna na manima? Beno telemisa... Nzambi sakumuna beno. Beno vwanda na kieleka. Na diboko ya kikento? Beno telemisa

maboko, mpe tuba, “Mpangi Branham, ata ti mu ke vwandaka Muklisto kubanda bamvula mingi, kasi, ya kieleka, mu me lutaka ata fioti ve na vwale yina. Mu me salaka yawu ata fioti ve. Mu ke na Yina ve bawu vwandaka na yawu na ntangu me luta.” Bubu yayi, beto ke na . . . “Mu ke felele ya ntwala ya yinzo ve.”

²³⁰ Beto baka bafelele ya beto yina ke yelaka na ntwala ya yinzo, beno fwana bondila yawu, kusimba-simba yawu, kutula yawu mupepe, kulosila yawu masa. Kasi yinti yina ya kisina ke yela kuna na ntoto ya kuyuma, felele ya mutindu mosi, ya kufwanana na yawu; yina ke bakaka ata ditonzi mosi ve ya masa, kasi banzinzi ke kukwisa na zulu ya yawu ve. Ya ke na mavimpi ya mbote. Ya kieleka.

²³¹ Beno lunga fwanikisa Kimuklisto na Kimuklisto ya bubu yayi, na yina yawu vwandaka ntete? Beno lunga banza ti kimvuka yayi, yina beto ke bokila Baklisto ya bubu yayi, na yinza yayi, ti bawu ke mutindu mosi na bayina kuna na Pentecote; ba ke bondila bawu mpe ke simba-simba bawu, mpe ke kwenda na yinzo-Nzambi mosi na yankaka, mpe, kana beno tuba kima mosi ke sepelisa bawu ve, bawu ke telema mpe ke basika? Mpe, oh, beno lunga banza yina? Ve. Yinki ke diambu? Ya ke kumekula.

²³² Wanzio mikayele, yina salaka monima ya Moise, beno lunga mekula yawu, na ntalu fioti. Kasi, yina ya kisina?

²³³ Muntu yina salaka kizizi ya Mbundana ya Mfumu, mu banza ti kizizi yina ya kisina lunga tekisama na ba million ya ba dollars, kana beno lunga sumba yawu diaka. Mu zaba mpe ve kisika yawu kele. Beno lunga sumba yina ba mekulaka na bampata makumi yivwa na nana ya ba dollars. Beno lunga sumba yawu.

²³⁴ Mpe ya ke mutindu mosi bubu yayi. Muklisto ya ntalu fioti, ya kumekula, muntu yina kaka ke kwendaka na yinzo-Nzambi mosi, beno lunga sumba yandi na dikaya mosi to—to malawu ya kintwadi. To, na kento yina me zengisa bansuki to na rouge à lèvres, beno lunga sumba yandi na konso kima yina ya mvwatu ya yinza. Kasi beno lunga simba ve yina ya kisina.

²³⁵ Mu ke mona Yandi pwelele, mutindu mosi mazono, bubu yayi, mpe kukonda nsuka.

²³⁶ Oh, Muklisto, beno zola vwanda Muklisto ya kieleka ve? Beno zola sala yawu, kana ke na bantu yina telemisaka maboko ya beno ve? Mbote, mu zola sambila. Nzambi sakumuna beno. Nzambi sakumuna beno. Oh, yina ke kaka kitoko. Beno tala kaka na yina.


²³⁷ Tata ya beto ya Mazulu, “Ndinga ya Nge ke vutuka na Nge ve kukondwa kisalu.” Nge ke Mosi yina salaka nsilulu. Mu ke kaka na kiyeka ya kutuba ti Nge tubaka Yawu. Mu ke vutukila kaka Bandinga ya Nge. Nge tubaka, “Yandi yina ke wa Ndinga ya Munu, mpe ke kwikila na Yina tindaka Munu, kele na Luzingu ya Kukonda nsuka.” Nge silaka yawu.

²³⁸ Mpe, Mfumu, beto zaba ti beto ke na bifwanisu ya bawu bubu yayi, mingi ke tuba ti bawu ke kwikila, kasi, bawu ke kwikila ve. Ya ke monana na meso. Kasi, Mfumu, kele na yina ya kisina, diaka.

²³⁹ Mu ke sambila ti Nge ke sala yawu kaka, awa, na nkokila yayi, ti konso bakala mpe kento, mwana-bakala to mwana-kento, kukondwa kutala yinsi bawu kele, ntinta ya bawu, yina ke dibuundu ya bawu, O Nzambi, fulusa bawu. Bika ti bawu mona kutalisama ya Yesu yina bubu yayi, na kati ya beto, mutindu Yandi vwandaka na Kilumbu ya Pentecote, na ntangu Yandi kukimonisaka Yandi mosi samu na nsungi yayi, na mutindu ya Mpeve-Santu. Pesa yawu, na kumonaka ti Bandinga ke lungisama, ba profesi ke lungisama!

²⁴⁰ Beto ke fwanikisa, bubu yayi, yina ba ke bokila dibuundu ya yinza kuna, Conseil Mondial ya Mabuundu, mpe ke fwanikisa yina na nsilulu mosi ya Pentecote? Ba lunga fwanikisa yawu ve, na nionso. Beto lunga sukula ve bilele ya beto ya mvindu na tiké yina.

²⁴¹ Kasi, Mfumu Nzambi, kana beto vutuka na Kiziba yina, mvindu ke katuka, na yina nzingilu ya beto mpe Ndinga ya Nzambi ke tambula kintwadi. Na yina, beto lunga lomba bima ya beto. Pesa yawu, Mfumu, na nkokila yayi, mutindu beto ke pesa bantu yayi na maboko ya Nge. Tata, pesa na konso muntu yina beto ke na yawu nsatu. Beto ke lomba yawu na Nkumbu ya Yesu. Amen.

²⁴² Nzambi sakumuna beno. Matondo mingi, na beno, samu mu me telema, mpe me vingila ntangu ya yinda. Mpe mu ke na kiadi samu mu me baka beno ntangu ya yinda tii na ngunga makumi zole na zole na bamuniti kumi. Nzambi kuvwanda na beno tii mu ke mona beno na suka. Mu ke vutula kisalu ntangu yayi, mu banza, na ntwadisi ya lukutakanu. 

NZAMBI YA NGOLO ME MONISAMA
PWELELE NA NTWALA YA BETO KNG64-0629
(The Mighty God Unveiled Before Us)

Nsangu yayi ya Mpangi William Marrion Branham, kulongamaka na Kingelesi, na nkokila ya Kilumbu ya ntete, na kilumbu ya 29 ya Ngonda ya Sambanu, na mvula 1964, na lukutakanu ya Full Gospel Business Men's Fellowship International na Bellevue-Stratford Hotel na Philadelphie, Pennsylvanie, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org